

中書典故彙記

四



中書典故彙紀卷八

仁和王正功輯

錢塘趙輯寧校補

雜錄

國朝詞林典故一書雖攷覈精詳而佳話流傳
或有未載以限於分門別類也今則於官制職
掌儀式恩遇建置題名所不能附者概以雜錄
收之俾後之人訪求逸事亦可按籍而稽也

禮記王言如絲其出如綸王言如綸其出如綍故中書
亦稱綸省

初學記

周禮宰夫八職有史以贊治漢法太史公位丞相上天

下計書先上太史公副上丞相唐宋宰相皆兼史官

春

明夢餘錄

西漢有三府丞相御史大夫大將軍也其後增二將軍
謂之五府東漢有五府太傅太尉司徒司空大將軍也
筆塵

客謂丙吉曰君爲漢相奸吏成其私然無所懲艾乎吉
曰夫以三公之府有按吏之名吾竊陋焉因爲故事公
府不按吏自吉始

文獻通考

于文定

慎行

曰漢唐以來宰相之任往往起家郡邑未

有以文學侍從不出禁門而進宅揆任天下之重者漢
宣帝以蕭望之才任宰相欲試以政事乃從少府左遷

爲馮翊曰所用皆更治民以攷功故試之于三輔此人

主任相之法也

春明夢餘錄

漢丞相月俸錢六萬

文獻通考

中書令弘恭僕射石顯自宣帝時久典樞機蕭望之建
白以爲中書政本不宜用宦官當罷之應古人不近刑
人之義

通鑑

中書尙書之名始于漢通典言漢武帝遊晏後庭始令
典事尙書謂之中書謁者則中書尙書只是一所後有
奏封事者輒下中書令出取之不關尙書則其時中書
尙書已分而爲二

文獻通考

按筆塵云尙書是士人中書則宦官也及江左以後

乃以中書尙書列爲兩省中書傳命尙書受而行之
則中書外廷吏也又設翰林學士于禁中專掌制命
而中書亦少疏矣及元設中書省而以尙書隸之則
中書外廷臣也今之內閣則漢之尙書令唐之中書
省而司禮中官則漢之中書令也

公孫弘爲丞相御史六歲年八十終於位

漢書

蔡義爲丞相時年八十

同上

東漢胡廣在公台二十餘年爲太傅年八十四

韋賢年八十二薨

漢書

漢匡衡以十年之間不出長安門而至宰相唐李絳亦
以十年之間位至宰相張鎬起布衣二期至宰相唐李

訓起流人一歲至宰相

山堂肆考

田千秋無他材能又無闕閱功勞特以一言悟主旬月取丞相封侯單于曰漢置丞相非用賢也一妄男子上書卽得之矣

西漢敘

宋太祖令太常禮院重定配享漢高祖以蕭何配文帝以周勃陳平配景帝以周亞夫竇嬰申屠嘉配武帝以丙吉魏相配

揮塵錄

漢王商有威重容貌絕人單于來朝商坐去央庭中單于前拜謁商離席與言單于仰視商容貌大畏之遷延卻立天子聞而歎曰真漢相也

山堂肆考

韋賢以明經爲丞相少子玄成復以明經歷位至宰相

又平當及子晏亦以明經位俱至宰相

漢書

漢丞相周亞夫丞相勃之子

漢書

漢丞相再入二人周勃孔光

困學紀聞

魏晉以來中書尚書之官始爲宰相而三公遂爲具員其故何也蓋漢之典事尚書中書號爲天子私人漢魏之末凡任中書者皆進籌帷幄佐命移祚之人凡任三公者皆備員高位畏權遠勢之人而三公之失權任中書之秉機要自此判

文獻通考

歷代宰相之稱不一擇出書之美惡亦並見也袁盎目申屠嘉爲愚相公孫弘贊曰儒相田千秋乘車入朝曰車丞相張蒼重計籍曰計相又贊曰名相王商以貌稱

真漢相翟方進曰通明相後漢杜陵曰任職相謝安曰
風流宰相武后稱杜景佺憲宗稱李絳皆曰真宰相令
狐綯爲相其子怙勢人稱爲白衣宰相盧懷慎曰伴食
宰相陸贄號內相閻立本爲丹青宰相姚崇爲救時宰
相蘇味道爲摸稜宰相李邦彥爲浪子宰相梁陶弘景
爲山中宰相蘇瓌蘇頲贊曰再世賢相關播曰盲宰相
楊再思曰癡宰相宋李沆曰聖相丁謂曰鶴相杜衍曰
清白宰相陳升之曰荃相蔡確曰三旨宰相寇準爲真
相李綱爲中興首相王欽若項有附瘤曰瘦相蔡京童
貫附之時人目京曰公相貫曰媪相梁師成內侍擅寵
爲太尉人目之曰隱相宋慧林道人權寵侔宰相孔顛

中書八
歎爲黑衣宰相魏野亦稱白衣宰相 七修類稿

按宋史云時人目王珪亦爲三旨宰相

又王導謝安爲江左賢相

又按筆塵云蔡京以太師封魯國公童貫以大傅封涇國公時人稱京爲公相貫爲媪相愚謂不如稱京爲相公貫爲相婆尤易明也時內侍梁師成亦至太尉時稱爲隱相亦媪相之別稱也

按老學菴筆記云蔡京爲太師賜印文曰公相之印因自稱公相

按澠水燕談曰王德用面色正黑遠夷君長皆知其名稱之曰黑相

按宋史高宗稱趙鼎孝宗稱留正皆曰真宰相

又林特有心計使幹財利時人目爲五鬼宰相

按明史稿云來宗道以編修倪元璐屢爭時事笑曰
渠何事多言詞林故事止香茗耳時謂宗道爲清客
宰相

按輔臣年表云時人以顧秉謙供逆璫指使名曰穿
白鼻宰相

按明史稿云袁煒李春芳嚴訥並以供奉青詞得入
政府後郭朴繼之世所謂青詞宰相

吳紀亮爲尙書令其子隲爲中書令每朝會吳主以屏
風隔其座

文獻通考

荀勗自中書令監爲尙書令人賀之乃發恚曰奪我鳳

凰池何賀之有

晉書

晉陳淮爲中書令張華爲監淮與華俱處機密而推崇之每至直詔書無大小必先示華華得詔書則不復示

淮省中號淮爲中書五郎

山堂肆考

王儉曰江左風流宰相惟有謝安蓋自況也

南史

中書令王獻之卒以王珉爲中書令世稱大王令小王

令

晉陽秋

珉父洽永和嘗爲中書令至此珉復繼之人以爲奕

世令聞

同上

晉諸葛恢爲臨沂令名亞王導庾亮謂曰明府當作黑

頭三公

晉書

晉羊祜祖墓有帝王之氣祜鑿之相者曰猶出折臂三公祜後墮馬折臂

同上

晉司馬望安平王孚之長子父子同居上公位百代以來未之有也

分紀

魏收兼中書舍人與溫子昇邢子才齊譽時號稱三才

北史

隋高穎事文煬兩朝有文武大略明達政務執政將二十年

柳氏家學錄

魏高允拜中書令歷事五帝出入三省五十年

北史

卞粹以清才兄弟六人並登宰輔世稱卞氏六龍

三十

國春秋

張嘉貞爲中書令薦中舍苗延嗣呂太工等四人皆位
清要日與議政事時號令君四俊

職官分紀

宰相領使最多者唐楊國忠領四十餘使元燕帖木兒
領五十餘使

湧幢小品

唐宰相三百六十九人九十八族

山堂肆考

按湧幢小品云唐之宰相最重世系崔氏裴氏張氏
最著裴氏五房宰相十七人崔氏十房十七人張氏
十七人韋氏九房十四人劉氏七房十二人蕭氏二
房十人竇氏二房六人楊氏杜氏皆十一人王氏三
房十三人鄭氏二房九人魏氏六人盧氏八人高氏

韓氏趙氏郭氏各四人陸氏六人武氏蘇氏五人其
三人而下者不與焉李氏最繁隴西四房宰相十一
人趙郡十七人唐高祖系出興聖皇帝暲暲子韻韻
子重耳凡四傳爲高祖炳世祖虎以至高祖三十七
房宰相十一人

按困學紀聞唐宗室宰相十一人林甫回程石福勉
夷簡宗閔適之峴知柔傳只云九人蓋不數福宗閔
唐開元中宰相共食實封三百戶謂之堂封及元載爲
相又日賜御饌可食十人遂爲故事其後乃至兩省每
歲符江淮大賈使主堂厨食利因是挾貲行天下所至
州縣鎮爲右客富人倚以自高李文饒始一切罷之以

一堂餐之微至遠取大賈主之又使商賈因以爲利政
體謂何贊皇固賢他人豈盡不知廉恥者乎而裴中立
李深之輩亦安之何耶

居易錄

按唐書云舊制堂封歲三千六百縑興元後國用大
屈纔一千二百

按通鑑云元載王縉爲相日賜御饌可食十人遂爲
故事常袞奏停之又欲辭堂餐同列不可而止

按唐書云乾封初同列以堂餐豐餘欲少損張文瓘
曰天子重樞務待賢才吾等若不任職當自引避不
宜節減以自取名

又云李德裕相罷江淮大賈主堂廚

唐開平中詔丞相位尊而堂厨未給無滄錢其令日食

萬錢之半

續通典

唐制宰相兼官者並兩給俸

文獻通考

唐時宰相食料一月三千緡一緡爲千當直三千金矣
筆塵

開元二十四年始定百官月俸一品三十千大麻十二年加京官俸三公宰相每月各一百二十貫文中書門下侍郎月各一百貫文

筆塵

按筆塵二說恐三千緡乃是三十緡之誤

又按唐書子儀歲入官俸無慮二十四萬緡

按獨異志唐郭汾陽授中書令歷二十四考月入俸

錢二萬貫官供二千人熟食馬料五百石

凡加食邑宰相千戶實封四百戶餘降麻官食邑七百戶實封三百戶直學士以上食邑五百戶實封二百戶舍人待制散尚書至少卿監以上食邑三百戶實封一百戶

春明退朝錄

唐世俸錢自會昌以後不復增減三師二百萬三公一百六十萬侍中一百五十萬中書令兩省侍郎左右僕射一百四十萬尚書御史大夫一百萬節度使三十萬蓋計一歲而言之也一萬當爲十緡二百萬則二千緡矣至北漢劉崇以太原一道正位建國宰相月止百緡節度使止三十緡較之唐末已爲太減乃今一統之盛

宰相猶不能半此

筆塵

唐太宗命京官五品以上更宿中書內省數延見問以
民間疾苦及政事得失

通鑑

唐景龍中洛下霖雨百餘日宰相令閉坊市北門卒無
效雨益甚人歌曰禮賢不解開東閣燹理猶能閉北門
山堂肆考

按唐書云楊再思爲丞相時水沴閉坊門以禳再思
入朝有車陷于海叱牛不前恚曰癡宰相不能和陰
陽而閉坊門使我艱于行再思遣吏謂曰爾牛自弱
不得獨責宰相

唐宰相再入者長孫無忌狄人傑李吉甫三入者劉幽

求張延賞鄭畋四入者韋巨源姚崇韋安石五入者蕭

瑀裴度

職源

按困學紀聞云唐宰相再入五十七人長孫無忌至
裴樞三入十二人武承嗣至鄭畋四入三人韋巨源
姚元之韋安石五入三人蕭瑀裴度崔胤惜再入之
五十七人三入之十二人未及詳載

按尉遲渥中書故事云張說三拜此命終始無玷自
古未有

唐初詔勅皆中書門下官有文者爲之乾封以後始召
文士草諸文詞常于北門候進止時人謂之北門學士
後遂有天子私人之目內相之稱

通鑑

天后多引文學之士元萬傾劉禕之等使撰列女傳等書時密令參決表奏以分宰相之權謂之北門學士

通鑑

蘇良嗣爲相遇懷義于朝堂懷義偃蹇不爲禮良嗣大怒命左右批其頰懷義訴于太后太后曰阿師當于北門出入南牙宰相所往來勿犯也唐分宰相爲南司故

稱南牙

通鑑

唐時政出多門遷除甚眾自宰相以下多者踰數十倍皆無廳事以處之時人以爲三無坐處謂丞相御史及

員外官也

通志

按唐書先天末宰相至十七人臺省要職不可數

蘇味道在相位依阿取容嘗謂人曰處事不宜明白但

摸稜存兩端可矣人謂之蘇摸稜

唐書

嗣聖四年同三品劉禕之竊謂舍人賈大隱曰太后廢
昏立明安用臨朝稱制大隱密奏太后命王本立宣勅
示之禕之曰不經鳳閣鸞臺何名爲勅

同上

按山堂肆考云自隋唐以來除改百官必有誥勅而
其制蓋須由中書門下省故劉禕之云云

中書省分左右曹以中書在右因謂中書爲右曹又中
書省與尚書省門下省謂之三省尚書省爲南省門下
中書爲北省又謂門下尚書省爲左省中書省爲右省
又謂之西省西掖內樞綸閣紫薇省

應劭漢官儀

按宋祖無擇言門下中書與尙書省其長官皆宰相之任今乃左省在西右省在東不可乞將中書門下省對移

按揮塵錄云唐高宗改門下省爲東臺中書省爲西臺尙書省爲文昌臺故御史臺爲南臺武后朝御史有左右肅政之號當時亦謂之左臺右臺則憲臺未聞有東臺西臺之稱

唐劉祥道與子齊賢樂彥暉與子思晦蘇瓌與子頰陸元方與子象先竇德元與子懷貞李道廣與子元紘令狐楚與子綯崔鉉與子沆杜審權與子讓能戴胄與子至德徐商與子彥相崔慎由與子胤韋承慶與子嗣立

鄭珣瑜與子覃李吉甫與子德裕俱父子爲宰相 山堂

肆考

唐來恆高宗朝以文學拜相弟濟永徽中拜中書令一

門二宰相也 同上

梁氏興江左實有功在民故餘慶及其後裔自瑀至邁

凡八葉宰相名德相望與唐盛衰

唐書八蕭贊

按瑀太宗朝嵩元宗朝華肅宗朝復德宗朝俛穆宗

朝寘宣宗朝放懿宗朝邁僖宗朝

按困學紀聞云蕭邁與其子三兒生日詩曰吾家九

葉相盡繼明時出唐史云自瑀逮邁凡八葉宰相此

云九葉宰相世系表梁真陽侯之後有鄴相宣宗

杜如晦五代孫元穎元穎姪審權俱爲宰相又鄭綱元和初拜相從子餘慶貞元中拜相

山堂肆考

封氏自太和以來世居兩制封舜卿從子德昭時爲翰林舜卿時爲中書舍人叔姪對掌誥命

唐書封敖傳

韋承慶出相除禮部尙書嗣立入拜鸞臺侍郎平章事時人語曰大郎罷相小郎拜相

南部新書

唐韋思謙二子曰承慶爲鳳閣舍人武后謂嗣立曰爾父嘗稱二子忠孝今使卿兄弟自相代卽拜嗣立代兄爲中書舍人

山堂肆考

唐李德林子百藥百藥子安期三世俱掌制誥

唐職林

令狐滈弟澄皆好文自楚及澄三世掌誥命

唐語林

蘇頲拜中書舍人時父瓌同中書門下三品父子同在
禁苑人以爲榮

唐書

王徽祖易從兄弟四人至鳳閣舍人者三人故號爲鳳

閣王家

九國志

唐徐堅祖孝德父齊三世爲中書舍人又徐嶠父子

自祖及孫亦三世爲中書舍人

集賢記註

唐張嘉貞太宗時以中書侍郎同平章事子延賞德宗
朝平章事孫弘靖元和中平章事時稱三相張家

山堂

肆考

按唐書張延賞贊云張氏三世丞相然各有所窮嘉
貞窮于俗延賞窮于伎弘靖窮于權

按李翱卓異記云張嘉貞至弘靖繼世掌綸誥今次
宗又拜焉士林稱之

張說子均孫濛三代皆自中書舍人拜禮部侍郎
卓異記

李世勣卒年八十六唐休璟卒年八十六劉仁軌卒年
八十五張柬之卒年八十二王及善卒年八十二
婁師德爲相者三十年 同上

王勃長壽中爲鳳閣舍人壽春等五王出閣有司具儀
忘載冊文勃召五吏執筆分占其詞燦然 山堂肆考

岑文本號善職而敏速或勅令叢遽勅書吏六七人執
筆分占口授咸無遺意 唐職林

唐元宗平內難書詔填委獨蘇頌在太極後閣其所占
授功狀百緒輕重無差書吏白曰乞公徐之不然手脫
腕矣

同上

陸辰拜中書舍人文思敏速初無思慮揮翰如飛文理
具愜同舍服其能鄭畋爲中書舍人咸通十年討徐方
書詔旁午畋灑翰泉湧動無滯思同僚擱筆和矇知制
誥每草詔必閉戶精思徧討羣籍而後成

職官分紀

齊澣爲中書舍人論駁及詔誥皆援準古誼朝廷大政
必咨之時號解事舍人

山堂肆考

唐于中書舍人中選一明達練事者知機密謂之解事
舍人

同上

韋執誼與妻父杜黃裳同時爲宰相 卓異記

唐宗室同堂兄弟三人曰石曰程皆登宰相惟福一人

歷七鎮使相 山堂肆考

天寶十二載以中書舍人朱昱知選事 通鑑

姚崇有子喪謁告十餘日政事委積檢校吏部尙書兼黃門監盧懷慎不能決惶恐入謝上曰朕以天下事委姚崇以卿坐鎮雅俗耳崇旣出須臾裁決俱盡頗有德色顧謂紫薇舍人齊澣曰余爲相何如管晏澣曰公可謂救時之相崇喜曰救時之相可易得乎 同上

盧懷慎自以吏道不及姚崇每事皆推讓之時人謂之

伴食宰相 唐書

紫薇舍人高仲舒博通典籍齊澣練習時務姚崇每坐
二人以質所疑旣而歎曰欲知古可問高君欲知今可
問齊君如此可以無缺政矣

同上

唐崔琳明于政事開元中與高仲舒同爲中書舍人侍
中宋璟親視之每有所訪逮嘗曰古事問仲舒今事問
琳尙何疑

山堂肆考

韓休峭直守正不阿宋璟歎曰不意休乃能如是上在
宮中小有過失輒問韓休知否言終諫疏已至上嘗臨
鏡不樂左右曰韓休爲相陛下殊瘦于前何不逐之上
曰吾貌雖瘦天下必肥且用韓休爲社稷計非爲身也

同上

宰相事無一統故不以一職名自開元以後常以領他職實欲重其事而反輕宰相之體故時方用兵則爲節度使時崇儒學則爲大學士時急財用則爲鹽鐵轉運使又其甚則爲延資庫使至于國史太清宮之類名頗多不足取法

文獻通考

唐興以來邊帥皆用忠厚名臣不久任不遙領不兼統功名著者往往入爲宰相李林甫欲杜邊帥入相之路乃奏言節度使盡用胡人此林甫固寵之謀也

通鑑

姚元之爲靈武道安撫大使將行太后令舉外司堪爲宰相者對曰張柬之沈厚有謀能斷大事且其人已老惟陛下急用之太后遂以柬之同平章事時年且八十

矣 同上

房元齡以盛德居位二十三年 柳氏家學錄

鄭覃歷官三十餘任未嘗出都門登相位以至于終 南

部新書

唐崔湜初執政年二十七容止端雅文詞清麗嘗出端門下天津馬上自吟曰春還上林院花滿洛陽城張燕公時為工部侍郎望之歎曰此句可效位可得其年不可及也 翰林盛事

裴瑄入相之年才四十四鬚髮盡白 南部新書

唐宰輔高士廉房玄齡配享太宗廟庭張行成李世勣配享高宗廟庭裴度配享憲宗廟庭桓彥範張柬之敬

暉崔玄暉袁恕已配享中宗廟庭張說配享玄宗廟庭
苗晉卿裴冕配享肅宗廟庭劉幽求蘇瓌配享睿宗廟
庭郭子儀配享代宗廟庭鄭畋配享僖宗廟庭

唐書

按揮塵錄宋太祖令太常禮院重定配享唐太宗以
長孫無忌房玄齡杜如晦魏徵李靖配明皇以張說
郭元振配肅宗以苗晉卿裴冕配憲宗以裴度杜佑
配宣宗以夏侯孜白敏中馬植配

唐宰輔唐儉蕭瑀字文士及溫彥博高士廉房玄齡岑
文本許敬宗李靖李世勣馬周楊恭仁崔敦禮陪葬昭
陵薛元超劉仁軌王及善豆盧欽望楊再思陪葬乾陵
張文瓘陪葬恭陵魏元忠陪葬定陵郭子儀陪葬建陵

而長孫無忌亦還葬昭陵

唐書

唐故事自三省得宰相有光署錢留爲宴資

同上

唐韋處厚相有湯鉢者爲中書小胥其所掌謂孔目房
宰相遇退休有內狀出卽召鉢至延英門付之送知印
宰相

元宗所用之相姚崇尙通宋璟尙法張嘉貞尙吏張說
尙文李元紘杜暹尙儉韓休張九齡尙直

文獻通考

唐自武德以來宰相寬厚以陸象先爲標首詞翰以姚
崇爲標首文學以張說爲標首決遣以張義正爲標首
山堂肆考

故事宰相午後六刻乃出李林甫奏太平無事巳時卽

還第機務皆決于私家主書抱成案各書名而已

通鑑

李邕撰郭元振行狀云自我有唐受命相臣未有二親存者惟元振而已

李翱卓異記

唐大厯時諫官所上封章必須門下中書兩省印署文牒有一封奏人且先知

山堂肆考

天寶十五年制諫官言事勿白宰相初李林甫爲相諫官言事先白宰相退則又以言白之御史言事須大夫同署至是勅盡革其弊以開諫諍之途

文獻通考

至德元年九月制諫議大夫論事自今以後不須令宰相先知

通志

元載爲相乃請百官論事先白長官長官白宰相宰相

定其可否則後奏聞

筆塵

唐初置史館于門下省開元中李林甫爲監修國史始

遷中書省

石林燕語

肅宗卽位于靈武上皇遣中書舍人賈至爲傳位冊文
上皇覽之嘆曰昔先帝遜位于朕冊文則卿之先父所
爲今朕以神器大寶付儲君又卿爲之兩朝盛典皆出
卿父子手可謂繼美矣至父名曾河南洛陽人

山堂肆

考

薛元超道衡孫也爲中書舍人中書省有一大盤石初
道衡爲內史侍郎常踞而草制超每見石輒泣然流涕

唐書

郭子儀朱泚以軍功爲宰相皆不預朝政常袞獨居政事堂代二人署名奏崔祐甫旣貶二人表其非罪上問卿向言可貶今言非罪何也二人初對不知以袞爲欺罔大駭乃貶袞爲潮州刺史

文獻通考

唐楊綰爲中書舍人故事年久者爲閣老其公解雜科獨取五之四至綰悉均給之

唐楊綰清儉簡素代宗相之制下之日朝野相賀郭子儀方晏客聞之減坐中聲樂五分之四京兆尹黎幹騶從甚盛卽日聞之止存十騎中丞崔寬第舍宏偉亟毀之

春明夢餘錄

李輔國求爲宰相上曰以卿之功何官不可爲其如朝

望未孚何輔國又諷僕射裴冕等使薦已冕曰吾臂可斷宰相不可得上大悅輔國銜之

通鑑

寶應元年以李輔國為司空兼中書令按前書為太僕卿矣又書加兵部尚書矣于是復為司空是三公也宦者為三公魏有劉謄唐有輔國

同上

李吉甫年五十一出鎮淮南五十四復相今李德裕自

鎮南後入相一如父之年

唐書

李吉甫子德裕皆自揚州節度使再入為相

卓異記

唐鄭畋盧鐫同在中書因議政喧競撲碎硯王繹嘆曰不意中書有瓦解之事

同上

楊洎為中書舍人時催作制勅令將鑰匙取出無本可

檢乃斲窗取本時號斲窗舍人

唐職林

高郢爲中書舍人九年家無制草或問之曰前輩皆有制草公獨焚之何也答曰王言不可藏之私室耳

同上

崔昭暴卒復生云見冥司列榜備書人間姓名將相列金榜其次列銀榜州縣並列長鐵榜

唐書

永徽中盧齊卿暴死復蘇見其舅某爲冥司判官有吏押案曰宇文融合爲宰相舅曰宇文融豈堪作相吏曰天符已下日數多少卽由判官舅乃判一百日旣拜果百日而罷

劉賓客嘉話

李蕃未仕時問卜于葫蘆生曰貴人也在紗籠中李問所由終不復言後有新羅生言位當宰相冥司必立其

像以紗籠之

唐紀

唐王徽爲相只一日中書至德五年二月除召義節度使徽上表乞免詞曰六年內署雖叨捧日之榮一日臺司未展致君之懇

南部新書

又宰輔年表云于慎行萬厯三十五年由禮部尙書入東閣趨朝甫一日遺疏告終

牛僧儒自中書侍郎出鎮武昌辟李珣爲書記其後十餘年間珣已爲戶部侍郎平章事時牛公自右僕射再入爲相正共珣同列相廷又權德輿撰杜佑神道碑云早參賓席晚連台座與使主同時爲相惟此二人

李肇

翰林志

李吉甫除中書侍郎平章事適與裴垪同直裴垪草吉甫制吉甫草武元衡制垂簾揮翰兩不相知至暮吉甫有嘆惋之聲垪終不言書麻尾之後乃相慶賀

同上

唐太宗與侍臣泛舟春苑池見異鳥容與波上詔坐者賦詩而召閭立本侔狀至總章元年拜右相時姜恪以戰功擢左相故時人有左相宣威沙漠右相馳譽丹青之譌

山堂肆考

韋貽範之爲相也多受人賂許以官旣而以喪罷去日爲債家所譟汲汲于起復日遣人詣兩中尉樞密及李茂貞求之上命韓偓草制偓曰吾腕可斷此制不可草也卽上疏論之中使怒曰學士勿以死爲戲偓以疏授

之解衣而寢中使奏之上命罷草明日班定無白麻可
宣宦官喧言韓侍郎不肯草麻茂貞入見曰陛下命相
而學士不肯草麻與反何異上曰學士所陳事理明白
若之何不從茂貞不說而出語人曰我實不知書生禮
數爲貽範所誤後竟起復 同上

中書省有柳樹建中末枯死興元中車駕還京其柳再
生人謂之瑞柳 舍人院志

唐憲宗嘗與宰相論治道于延英殿日旰暑甚汗透御
服宰相恐上體倦求退上曰朕入宮中所與處者獨宮
人宦官耳故樂與卿等共談爲治之要殊不知倦也 通鑑

唐穆宗時宦官崔潭峻薦元稹知制誥朝論鄙之會同僚食瓜于閣下有青蠅集其上武儒衡以扇揮之曰適從何來遽集於此同僚皆失色儒衡意氣自若

通鑑

杜邠公先達人謂之老杜相公杜審權晚入人謂小杜相公

南部新書

唐穆宗召王仲舒爲中書舍人既至視同列率多新進少年居不樂曰豈可復治筆硯于其間哉

山堂肆考

文昌雜錄載元相詩松門待制應全遠藥樹監察御史監搜之位在焉唐知云唐時殿門外有藥樹監察御史監搜之位在此焉唐制百官入宮殿必搜御史掌之太和中乃下詔宰臣奏事停其監搜

池北偶談

裴度十拜相詔四登將壇

山堂肆考

裴度鎮河東以疾求歸東都詔入知政事至京師不能入見勞賜旁午度身貌不踰中人而威望遠達四夷四夷見唐使輒問度老少用舍以身繫國家輕重如郭子儀者二十餘年

通鑑

裴度在中書左右忽白失印聞者莫不失色度卽張筵舉樂夜半晏酣左右忽白印存或問其故度曰此胥吏輩盜印書券耳緩之則存若急則投諸水火矣

王泉子

唐制舉之名多至八十有六凡七十六科至宰相者七十二人本朝制科四十人至宰相者富弼一人而已中興復制科止得李廔一人

困學紀聞

唐謂宰相曰鼎臣又曰鼎位

姑藏集

唐時宰相相呼曰堂老兩省曰閣老尙書曰院長御史曰端公近來桂林呂公爲江陵封君作志稱首揆曰端公誤

筆塵

唐德宗猜忌宰相不敢私第見客裴度爲相奏云今寇盜未平宰相宜招延四方賢才與商謀議請于私第見客許之

山堂肆考

唐尙書省南門有古槐垂陰至廣相傳夜聞絲竹之音省中卽有入相者俗謂之音聲木

因話錄

五代時范公質舉進士主司和凝愛其文謂之曰宜冠多士屈居第十三者欲君傳老夫衣鉢耳有獻詩云從

中書八
此廟堂添故事登庸衣鉢亦相傳後果爲相

聞見錄

五代唐末帝時馬裔孫赴闕宿羅府其地有神祠夜夢
神手授二筆及爲翰林學士裔孫以爲契夢筆之兆洎
入中書上事堂吏奉二筆似夢中所授者

太平廣記

唐王及善曰中書令可一日不見天子乎太祖開寶九
年以中外無事始詔旬假日不坐然其日輔臣猶得對
於後殿問聖體而退

春明退朝錄

唐昭宗時鄭綮好詼諧多爲歇後詩譏嘲時事中人有
誦于帝前者上意其有蘊未盡因有司上班簿遂手註
其側曰可禮部侍郎同中書門下平章事旣而賀客至
綮搔首言曰歇後鄭五作宰相時事可知矣

山堂肆考

按唐書宰相列傳載昭宗相鄭綮中書胥吏詣其家
參謁綮聞且驚且笑謂諸君大誤縱使宰相並不識
字亦不及鄭五也胥吏曰聖旨特恩明日制下抗手
曰若果有此笑殺他人

後晉虞玩遷司空玩陳讓不聽既拜謂賓客曰以我爲
三公是天下無人矣

餘冬序錄

宋太祖將改元諭宰相曰年號須擇前代所未有者及
蜀平蜀宮人入內帝見其鏡背有識乾德四年鑄者怪
之出示宰相皆不能答翰林學士竇儀對曰此必蜀物
昔蜀王衍常有此號太祖嘆曰宰相必用讀書人由是

益重儒臣

通鑑

按石林燕語云宋太祖改元乾德因言此號從古未有韓王從旁稱贊盧多遜曰此僞蜀時號也帝大驚遂令檢史視之果然

盧多遜占對詳敏動皆稱旨他日太祖謂左右曰作宰相須用儒者

筆錄

國朝宰相自崇寧以前乾德二年范質王溥魏仁浦罷趙普相開寶六年罷獨相者十年雍熙二年宋琪罷李昉在位端拱元年罷獨相者四年淳化元年趙普罷呂蒙正在位獨相者踰年景德三年寇準罷王旦相祥符五年向敏中相旦獨相者七年天聖七年王曾罷呂夷簡在位明道元年張士遜復相夷簡獨相者三年皇祐

三年宋庠文彥博罷龐籍相獨相者二年元祐九年呂
大防罷章惇相獨相者七年七朝獨相者七人

石林燕

語

按宋史宰輔年表治平四年韓琦罷曾公亮在位獨
相者二年熙寧四年韓絳罷王安石在位獨相者四
年元豐三年吳充罷王珪在位獨相者二年崇寧元
年韓宗彥曾布罷蔡京在位大觀元年趙挺之罷京
尙在位獨相者先後共六年宣和二年蔡京余深罷
王黼在位獨相者四年紹興八年趙鼎罷秦檜在位
獨相者十八年漳熙元年曾懷罷葉衡在位獨相者
一二年漳熙五年史浩罷趙雄在位獨相者三年漳熙

八年趙雄罷王淮相獨相者六年
淳熙十六年周必大罷留正在位獨相者四年
慶元二年余端罷京鎿相獨相者四年
慶元六年京鎿卒謝深甫相獨相者三年
嘉泰三年謝深甫罷陳自強相獨相者二年
嘉祐元年錢象祖罷史彌遠相獨相者二十四年
紹定六年史彌遠卒鄭清之相獨相者二年
嘉熙四年喬行簡罷史嵩之在位獨相者四年
淳祐七年游侶罷鄭清之復相獨相者又二年
淳祐十二年吳潛罷謝方叔在位獨相者三年
寶祐四年董槐罷程元鳳相獨相者二年
景定元年吳潛罷賈似道在位獨相者

八年

國初猶右武廷試進士多不過二十人少或六七人自建隆至太平興國二年更十五榜所得宰相畢文簡公一人而已自後太宗始欲廣致天下之士以文治是歲一百九人遂得呂文穆公爲首舉張僕射齊賢宰相二人自是取人益廣得士益多百餘年間得六人者一榜楊寘榜王岐公韓康公王荆公蘇子容呂晦叔韓師朴得四人者二榜蘇參政易簡榜李文正向文簡寇萊公王魏公而岐公康公荆公皆連名得三人者三榜王沂公榜沂公王文惠張郇公劉輝榜劉莘老章子厚蔡持正改科後焦韜榜徐擇之白蒙亨鄭達夫畢漸榜杜美唐欽叟呂元直

避暑錄話

按避暑錄話又云淳化三年孫何爲第一而丁晉公
王冀公張鄧公三宰相在其間

親王樞密使留守節度使兼侍中中書令同平章事者
皆謂之使相乾德二年范質等三相皆罷以趙普同平
章事李宗舉爲樞密使命下無宰相書勅使問翰林陶
穀穀曰自昔輔相未嘗虛位惟唐太和中甘露事數日
無宰相時左僕射令狐楚等奉行制書今尙書亦南省
長官可以書勅竇儀曰穀之所陳非承平令典今皇弟
開封尹同平章事卽宰相之任也可書勅從之

通鑑

國朝自建隆至紹熙宰臣生拜太師者五趙普文彥博
蔡京秦檜史浩惟蔡秦二人以相臣特拜其餘皆還政

加恩云 朝野雜記

開寶元年王祐知貢舉擢進士合格者十有八人陶穀子炳名在第六太祖曰吾聞穀不能訓子炳安得登第命中書覆試而炳復登第詔曰文衡公器選士慎勿樹私恩凡關食祿之家悉令中書覆試 通鑑

宋趙普常設大瓦壺于視事閣中中外表疏意不可者投其中焚之 同上

按趙善瑋自警篇云國初趙中獻爲相於廳事坐屏後置二大甕凡有人投利害文字皆置中滿卽焚之 通衢

宋呂陶言中書舍人前世推重爲宰相判官豈容序遷

本朝宰相兼公師者范晉公王文獻趙韓王薛文惠王
文貞丁晉公馮文懿王文公呂文靖韓忠獻曾宣靖富
韓公文潞公呂正獻蔡師垣秦師垣陳魯公而已餘皆
罷政後拜 揮塵錄

國朝自外拜相者文潞公韓康公張子厚近年陳魯公
同上

宋張齊賢四踐兩府九居八座以三公就第康寧福壽
世罕其比 山堂肆考

宋朝宰相三入者呂文穆 蒙正 趙韓王 普 李文正 昉 又

呂許公張鄧公皆再入王沂公前後輔政十年王文正

公爲相一紀 職源

又按春明退朝錄云趙中令太祖朝初相太宗朝再入呂文穆太宗朝再相眞宗朝一入呂許公張鄧公仁宗朝皆三入

又按游宦記聞云本朝宰相三入者四人趙韓王向文簡王冀公文潞公四入者止蔡京而已然其人不足算也

考宋史宰輔年表三入相者趙普呂蒙正呂夷簡張士遜文彥博朱勝非四入者蔡京其餘李昉張齊賢向敏中王欽若寇準丁謂王曾陳執中富弼王安石范純仁趙挺之韓絳呂頤浩趙鼎鄭清之秦檜吳潛程元鳳史浩皆再入而李昉向敏中王欽若曾先爲

參知政事是以各書所載皆有三入相之說

北宋宰輔趙普配享太祖廟庭薛居正配享太宗廟庭
李沆王旦配享眞宗廟庭王曾呂夷簡配享仁宗廟庭
韓琦曾公亮配享英宗廟庭富弼王安石配享神宗廟
庭司馬光蔡確配享哲宗廟庭韓忠彥配享徽宗廟庭
南宋宰輔趙鼎配享高宗廟庭陳康伯史浩配享孝宗
廟庭葛邲配享光宗廟庭趙汝愚配享寧宗廟庭

宋史

趙中定庚申韓平原壬申生繼庚申史忠獻甲申生繼
壬申鄭丞相丙申生繼甲申四申相乘自古罕有

王文

正筆錄

寇準出入宰相三十餘年不營私第處士魏野贈詩曰

有官居鼎鼐無地起樓臺自淮南遷時北使至內宴宰
執預焉使者列視諸相語譯導者曰孰是無地起樓臺
相公畢坐無答者 王文正筆錄

國朝身爲宰相壽考康寧再見其子入政府者曾宣靖
一人而已 揮塵錄

參知政事之父見其子進拜者盧朱崕吳正肅與尙書
張安道樞副陳堯叟張文孝晁文肅 春明退朝錄

國朝名公多厄於六十六韓忠獻歐陽文忠司馬溫公
王荆公蘇翰林而秦師垣亦然 同上

至道二年命宰相毋得進用臺官言者謂臺官必由中
旨乃祖宗法也帝曰祖宗法不可壞宰相自用臺官則

宰相過失無敢言者矣故詔自今臺官非中丞知雜保

薦者毋得除授

通鑑

靖康元年詔親擢諫官宰執勿得薦舉

宋史

呂蒙正初入朝堂有朝士指之曰此子亦參知政事耶
蒙正佯為不知而過之同列不能平詰其姓名蒙正遽
止之曰若一知其姓名則終身不能忘不若不知之為
愈也時人服其量

通鑑

呂蒙正為相夾袋中有冊子每四方人替罷謁見必問
其有何人才隨即疏之朝廷求賢取之囊中

山堂肆考

盧多遜專政羣臣章奏必先白多遜然後敢通又必于
閣門署狀云不敢妄陳利便希望恩榮

通鑑

國朝狀元爲宰相者四人呂文穆王文正李文定宋元
憲文穆登第十二年拜文正二十一年文定二十九年
元憲二十七年文正文定皆再入而文穆三入爲尤盛
石林燕語

按詩話載石揚休詩曰皇朝四十三龍首身到黃扉
止四人

按宋史自靖康後狀元入相者尙有五人政和五年
何棨紹興三十年梁克家嘉定十年吳潛濠佑四年
留夢炎寶祐四年文天祥又查乾道二年初定趙汝
愚爲首以宗室降居第三不得兼狀元宰相
國初天下始定更崇文士自殿試親放榜後狀元往往

遂見峻用呂文穆公太平興國七年登科八年已爲參

知政事李文正昉乃其座主於是爲相與文穆公同在

二府後五年文正罷文穆遂代爲相李文定公景德二

年登科天禧元年爲參知政事後三年爲相距登第亦

纔十六年登第時寇萊公已爲相馮魏公已爲參知政

事後亦代萊公爲相而魏公尙樞密使其後王文正公

以咸平五年登科大中祥符九年爲參知政事乾興元

年爲相距登第二十一年登第時韓魏公爲同知樞密

院事王冀公爲參知政事後亦代魏公爲相而冀公自

江寧再入自是無復繼者

石林燕語

國朝宰相趙中令盧相文潞公四十三登庸寇萊公四

十四王沂公四十五賈魏公四十八

春明退朝錄

未四十執政者寇萊公三十一張魏公三十三晏元獻

三十五蘇太簡錢宣靖韓魏公四十趙韓王王沂公三

十九富韓公四十

朝野雜記

按春明退朝錄云參知政事蘇侍郎易簡三十六

本朝未四十拜相者范覺民三十一吳元中何文纘皆

三十張魏公三十九

同上

未三十知制誥者蘇太簡二十六吳元中二十七晏元

獻宋宣猷王懿恪張安國皆二十八王文正夏文莊皆

三十

同上

按春明退朝錄云知制誥王沂公二十七盧相楊文

公皆二十八

國朝宰相致事從容進退享高壽者六人張鄧公八十
六陳文惠八十二富鄭公八十一杜祁公八十李文定
七十七龐隱公七十六而文潞公至九十二

避暑錄話

按揮塵錄所載國朝宰相享者壽者尙有宋惠安八
十宋元獻七十九曾宣靖八十蘇丞相八十二文潞
公雖九十四而薨貶秩中蔡師垣九十一而晚節拘
籍南遷殂于中路不得全有富貴考終

按宋史云喬行簡平章軍國重事卒年八十六

呂文穆公

蒙正

與仲子文靖公

夷簡

夷簡子惠穆公

公

彌

正獻公

公著

及曾孫舜徒五世俱執政

山堂肆考

呂文穆相太宗猶子文靖參眞宗政事相仁宗文靖子
惠穆爲英宗樞副爲神宗樞使次子正獻爲神宗知樞
相哲宗正獻孫舜徒爲太上皇右丞相繼執七朝政眞
盛事也

揮塵錄

宋三世執政者二家韓魏公琦與子儀公曾孫似夫又

曾魯公公亮與子孝寬孫欽道俱三世執政山堂肆考

三世宰相者呂文穆從子文靖從孫正獻又近時史越

王子衛王孫嵩之三世爲相朝野雜記

按山堂肆考云宋孝宗朝史浩寧宗朝浩子彌遠理
宗朝彌忠子嵩之三葉皆爲宰相

宋父子秉政自國初至靖康元年凡十二家王惠獻公

化基 與子安簡公 舉正 呂文靖公 夷簡 與子正獻公 公

著 石元懿公 熙載 與子文定公 中立 陳給事 恕 與子恭

公 執中 韓忠獻公 億 與子莊敏公 纘 韓魏公 琦 與子 忠

彥 范文正公 仲淹 與子忠宣公 純仁 曹武惠公 彬 與子

武穆公 瑋 蔡丞相 確 與子 懋 蔡太師 京 與子 攸 曾宣靖

公 公亮 與子 孝寬 王侍郎 博文 與子忠簡公 壽 皆父子

秉政 卻掃編

宋呂正獻公與孫舜徒韓儀公與曾孫似夫梁莊肅與

孫才甫富文忠與孫季申錢文僖與元孫處和王文獻

與孫康靖張師黯與孫簡翼張章簡與孫元量張榮僖

與曾孫忠文蔣穎叔與曾孫子元皆祖孫執政 山堂肆考

按揮塵錄尚有呂參政餘慶弟正惠端任安惠中師

弟康懿中正張參政垣弟左轄棗陳文忠堯叟弟文

惠堯佐章文憲得象從孫樞密案丞相惇吳正肅育

弟正惠充胡文恭姪左丞宗愈林文節希從子中書

據鄧樞密洵武弟左轄洵仁錢端禮之子文僖參政

洪适之子樞密洪遵皆一家執政而韓忠獻與子莊

敏外尚有康公絳弟黃門維范文正子忠宣純仁外

尚有左轄純禮韓魏公琦與子忠彥外尚有曾孫侂

胄亦一家執政

宋胡文恭與姪修簡林文簡與姪彥振史僉樞與姪文

惠皆叔姪執政山堂肆考

宋父子掌制誥者國初至熙寧元年凡九家李昉與子宗諤王祐與子旦王忠獻與子安簡晁迥與子文莊錢希白與子修懿梁顥與子適昌呂夷簡與子公綽宋綬與子敏求蘇紳與子頌

春明退朝錄

秦少游集中有與鮮于子駿書云今中書舍人皆以伯仲繼直西垣前世以來未有其事誠國家之美事非特衣冠之盛也除書始下中外欣然舉酒相屬予以其時攷之蓋元祐二年謂蘇子由曾子開劉原父也子由之兄子瞻子開之兄子宣貢父之兄原父皆經是職故少游有此語耳紹興二十九年子仲兄始入西省至隆興二年伯兄繼之乾道三年余又繼之相距首尾九載子

作謝表云父子相承四上鑿坡之直弟兄在望三陪鳳

閣之游

宋韓忠獻公億生子八綱綜絳繹維縝緯緬而絳縝兄

弟皆拜相魏公四子忠彥相繼為相而嘉彥徽宗朝復

拜相封儀國公山堂肆考

王旦拜右正言知制誥父祐以清名久掌書命不十年

旦繼其任時論美之同上

宋天禧四年參政任中正樞副錢惟演參政王曾並兼

太子賓客執政兼東宮官自此始同上

宋曾鞏元豐中為中書舍人時哲宗為延安郡王命鞏

典王府牋奏故事翰林掌之上特命鞏同上

向敏中除右僕射上謂李昌武曰朕自卽位以來未嘗
除僕射敏中應甚喜賓客必多卿往觀之往見丞相方
拒客門無一人使人矚其庖中亦寂無一人明日具以
所見對帝大笑曰向敏中大耐官職

言行錄

宋眞宗時寇準知天雄軍契丹使過大名謂準曰相公
望重何故不在中書準曰主上以朝廷無事北門鎖鑰
非準不可耳

通鑑

宋眞宗初欲相王欽若王旦曰臣見祖宗朝未嘗有南
人當國者雖古稱立賢無方然亦須賢士乃可爲宰相
臣不敢阻抑人此亦公議也乃止及旦罷欽若遂相欽
若謂人曰爲王子明遲我十年作宰相

同上

李沆在政府日取四方水旱盜賊奏之王旦以爲細事
不必煩帝聽沆曰人主少年當使知四方艱難不然血
氣方剛不留意于聲色犬馬則土木甲兵禱祠之事作
矣吾老不及見此參政他日之憂也同上
李沆爲相治第封邱門內廳事前僅容旋馬或言其太
隘沆笑曰居第當傳子孫此爲宰相廳事誠隘爲太祝
奉禮廳事則已寬矣山堂肆考

按居易錄云太常贊禮郎宋之太祝也宋重其官以
宰相任子爲之

按宋史云盧多遜爲相其子雍起家卽授水部員外
郎至是呂蒙正奏曰臣忝甲科及第釋褐止授九品

京官今臣男始離襁褓膺此寵命恐懼陰譴乞以臣
釋褐時官補之自是宰相子止授九品京官
寇準在中書喜用寒雋舉措多自任同列忌之嘗除官
同列目堂吏持例簿以進準曰宰相所以進賢退不肖
例簿何爲

言行錄

按日知錄云寇萊公爲相章聖常語兩府欲擇一人
爲馬步軍指揮使公方議其事吏有以文籍進者公
問何書對曰例簿公曰朝廷用一衙官尙須檢例耶
安用我輩壞國政者正由此耳

寇準數短王旦于帝前而旦專薦準中書有事關送樞
密院事礙詔格寇公在樞府特以聞上以責公公拜謝

引咎堂吏皆遭責罰不逾月密院有事送中書亦違舊
詔堂吏得之欣然呈公公曰卻送與密院吏出白寇公
寇公大慚翌日見公曰同年甚得許大度量公不答
名
臣遺事

王公在中書省寇公在密院中書偶倒用了印寇公須
勾吏人行遣他日樞院亦倒用了印中書吏人呈覆亦
欲行遣公問吏人汝等且道密院當初行遣倒用印者
是否曰不是公曰既是不是不可學他不是
龜山語錄

天禧三年復以寇準同平章事丁謂參知政事準之初
召也門生有勸準者曰公若至河陽更求補外此爲上
策倘入見卽發乾祐天書之詐次也最下則再入中書

準不悅

通鑑

丁謂因準稱譽得致通顯雖同列而事之甚恭嘗會食中書羨污準鬚謂起拂之準笑曰參政國之大臣乃爲長官拂鬚耶

同上

宋進士自鄉舉至廷試皆第一者三人王曾宋庠爲名宰相馮京爲名執政不愧科名云

同上

宋興以來以三公平章軍國事者四人而公著與夷簡居其二世美其榮其二人文彥博王旦

同上

大中祥符五年玉清昭應宮成王魏公爲首相始命充使宮觀置使自此始然每爲現任宰相兼職天聖七年呂申公爲相朝廷崇奉之意稍緩因上表請罷使名自

是宰相不復兼使康定元年李若谷罷參知政事留京師以資政大學士爲提舉會靈觀事宮觀置提舉自此始自是學士待制知制誥皆得爲提舉因以爲優閑不任事之職矣

同上

按詞林典故云宋天聖間以宰相爲提舉

慶厯中杜衍爲相苞苴貨殖不敢到門時號清白宰相

山堂肆考

寶元元年七月新作舍人閣上親篆其榜曰紫薇閣

宋

仁宗實錄

宋劉邠字貢父元祐中拜中書舍人請復古制建紫薇

閣于西省

山堂肆考

按夢溪筆談云唐中書省植紫薇花至今舍人院紫薇閣植之循唐故事也

嘉祐中韓琦與富弼同相或中書有疑事往往與樞密

謀之

通鑑

韓魏公爲相曾公亮爲亞相趙康靖歐陽公爲參政凡事關政令則曰問集賢談典故則曰問東廳該文學則曰問西廳至于大事則自決之人以爲得宰相之體

言
行錄

魯宗道剛正嫉惡遇事敢言貴戚用事者皆憚之曰爲魚頭參政因其姓且言骨鯁也

同上

范仲淹嘗謂王曾曰明揚士類宰相任也公之盛德獨

少此耳曾曰恩欲歸已怨將誰歸耶

同上

宋文彥博逮事四朝任將相者五十餘年遍歷公孤兩以太師致仕

事略

至和二年以文彥博富弼同平章事制下士大夫相慶于朝帝遣小黃門覘知之語歐陽修曰古之命相或得之夢卜今朕用二相人情如此豈不賢于夢卜哉會契丹使者耶律防至王德用與射于玉津園防曰天子以公爲樞密而用富公爲相將相皆得人矣

通鑑

曾公亮自嘉祐秉政至熙寧中尙在李復中作詩曰老

鳳池邊蹲不去饑烏臺上噤無聲

東軒筆記

王欽若狀貌短小項有附瘤時目爲癭相

通鑑

湘山野錄錢希白見王冀公欽若戲曰中堂遂有如此

宰相乎又聞見錄富鄭公與康節食筍公曰未如中堂

骨董之美池北偶談

按山堂肆考云宋王冀公欽若貌疏瘦舉止山野復

贅于頸常以文謁錢希白希白頗蔑視之有術者曰

此乃人中之貴何可輕也錢曰中堂便有此等宰相

乎術者曰第恐不免事不遠矣

宋太祖幸洛陽張齊賢以布衣獻策條陳十事內四說

稱旨齊賢堅執以爲皆善太祖怒命拽出之及還語太

宗曰我幸西都惟得一張齊賢耳我不欲官之他日可

輔汝爲相通鑑

韓康公得解過省殿試皆第三人其後爲執政自樞密副使參知政事拜相及再宰四遷皆在熙寧中故蘇子容挽詞曰三登慶厯三人第四入熙寧四輔中

石林燕

語

李迪左遷知鄆州丁謂罷知河南府明日謂入謝願復留遂自出傳口詔復入中書視事時劉筠已草迪謂同罷制旣而謂復留命草制筠不奉詔乃更召學士晏殊草之筠自院出遇殊殊惶愧側面不與揖

通鑑

唐憲宗以節度使王鐔帶宰相之銜李藩以筆塗詔附奏曰不可真宗以劉美人爲貴妃李沆引燭焚詔而附奏曰不可人臣居密勿之地君有過舉執奏可也塗詔

不可也焚詔不可也

東谷贅言

唐制惟給事中得封還詔書富鄭公知制誥日劉從愿妻遂國夫人蒙正女也卽奪封罷朝謁久之復其遂國封公乃繳還詞頭其命遂寢中書舍人繳詞頭自鄭公始

清波雜志

杜衍爲相務裁僥倖每有內降率寢格不行積詔至十數輒納上前帝常語歐陽修曰外人知杜衍封還內降耶凡有求于朕每以杜衍不可告之而止者皆其所封還者也

長編

宋劉敞知制誥宦者石金除觀察使公封還詞頭不草制其命遂止

山堂肆考

王巖叟除中書舍人滕元發自太原易許昌公封還詞
頭言今以走馬承受一言便易邊帥此風寢長非委任
安邊之福命遂寢

言行錄

胡銓兼中書舍人有旨以中人李綽等嘗典發軍書各
進官一列公不奉詔綽等泣訴上曰胡銓不肯

楊誠齋

撰胡澹菴行狀

陳傅良字君舉除中書舍人宦者陳源除內侍省押班
公執奏再三終不奉詔

山堂肆考

青苗之法行帝問李定定曰民甚便之于是諸言新法
不便者帝皆不聽遂拜御史裏行宋敏求蘇頌李大臨
爭之言定不由銓考墮紊法制封還制書執奏不已並

落職天下謂之熙寧三舍人

通鑑

故事宰相食邑滿萬戶始開國賈文元罷相知北京未滿萬戶以出佐平貝州功特封安國公其後以武勝軍節度使入爲祥源觀使留京師請還節仁宗特置觀文殿大學士寵之觀文之有大學士自文元始蘇子容輓詞所謂大邦開國賞元勛祕殿升班寵舊臣是也

清波

雜志

天聖三年錢思公除中書門下平章事錢希白爲學士當制希白于思公從父兄也兄草弟麻當時以爲盛事建中靖國元年曾子宣自樞府入相其弟文昭公肇字子開適草制本朝惟此兩人而已

石林燕語

按揮塵錄載元符末曾文肅自知樞拜相是夕文昭
鑱宿禁林爲對論旨草制昭力辭上曰弟草兄麻太
平盛事禁中已檢韓絳故事矣不須辭文昭始拜命
蓋熙寧中韓康公入相實持國當制國朝以來兩家
而已金坡遺事載希白爲文僖草麻雖云儀同鈞衡
實未嘗秉政也

按山堂肆考云熙寧初韓絳拜相令其弟持國草制
持國懇辭兄弟之嫌得請

文潞公爲太常博士通判兗州回謁呂許公一見器之
曰異日必大貴達卽日擢爲監察御史不十年入相潞
公自慶厯八年登相至七十九歲以太師致仕凡帶平

章者三十七年

夢溪筆談

王旦柄用凡十八年爲首推當國一紀

國史

宋故事宰相以使相致仕者給全俸公以司徒使相致仕居洛自三公俸一百二十千外皆不受

聞見錄

本朝以科舉取士得人爲盛宰相同在第一甲者王文正榜王文忠宋莒公榜曾魯公王伯庸榜韓魏公文潞公劉輝榜劉莘老章子厚葉祖洽榜蔡魯公趙正夫

石

林燕語

本朝宰相自建隆元年至元祐四年一百三十年凡五十人自元祐五年至今紹興六年四十六年凡二十八人幾倍于前也

同上

王伯庸 名堯臣 榜韓魏公第二趙康靖公第三嘉祐末

魏公爲相康靖爲參知政事伯庸雖先罷去而魏公與康靖公同在政府當時號爲盛事熙寧末王荆公相韓康公王禹玉爲參知政事三人亦皆同年且在第一甲連名禹玉第二康公第三荆公第四荆公再入仍與康公並相時陸子厚作詩云須信君王重儒術一時同榜用三人 同上

按山堂肆考云王安石題中書院壁夜開金鑰詔詞臣對御抽毫草帝綸須信朝廷重儒術一時同榜用三人

宋慶厯初仁宗服藥久不視朝一日聖體康復思見執

政坐便殿促召二府宰相呂許公移刻方赴召比至行
愈緩既見上上曰久疾方平喜與卿等相見而遲遲其
來何也公曰陛下不豫中外頗憂一旦聞急召近臣臣
若奔馳以進慮人心驚動耳上以爲深得輔臣之體

宋張澤民死七日復生自云至一處若瓊瑤世界其堂
上扁金牌曰五相清燕之堂澤民問其守闕吏曰五相
可得聞乎曰呂相夷簡劉相迪李相沆龐相籍富相弼
也

翰苑名談

唐開元宰相奏請狀及鄭畋鳳池稿多用四六皆宰相
自草五代亦然至范質始除其繁詞故萊公謂楊文公
曰予不能爲唐時宰相蓋嫻於詞命也然其間應制詞

章比今猶百倍

丹鉛總錄

祖宗朝執政私第接賓客有數庶官幾不可復進自王荆公欲廣收人才于是不以品秩高卑皆得進謁然自是不無夤緣干求之私進見者既不敢廣坐明言其情往往皆于送客時羅列于廡下以次留身敘陳而退遂以成風執政既日接客至休日則皆杜門不復通閤吏亦以榜揭于門曰假日不見客故事見執政皆著靴不出笏然客次相與揖則皆用笏京師士人因言堂上不說話而廡下說話假日不見客而非假日見客堂上不

出笏而客次出笏謂之三拘

石林燕語

宋宰執每歲內侍省有例賜將命者曰快行家皆以私

中書八
錢一千贈之元豐元年除日神宗于禁中忽得吳道子
畫鍾馗像因使鏤板賜二府吳冲卿時爲相欲贈以常
例王禹玉曰上前未有特賜此出異恩當稍增之乃贈
五千其後御藥院遂爲故事明年除日復賜冲卿援例
復贈五千冲卿戲謂同列曰一馗足矣眾皆大笑

宋嘉祐中歐陽文忠公與韓公同心輔政每議事心有
所未可必力爭韓公亦開懷不疑故嘉祐中多以爲得
體

山堂肆考

王珪爲宰相十六年無所建明當時目爲三旨相公以
其時上殿進呈云取聖旨上可否訖云領聖旨退諭稟
事者云得聖旨也

宋史

曾宣靖公提舉修英宗實錄成將上故事常遷一官曾
官已左僕射乃預辭于上曰臣官進一等則爲司空此
三公之職也坐而論道不可以賞勞神宗以爲誠遂從
其請書上曾獨不遷人以爲得體

石林燕語

王安石旣執政士大夫多以爲得人呂誨獨言其不可
大用將入對學士司馬光密問所言何事誨曰袖中彈
文乃新參也

通鑑

神宗駕崩司馬光自洛入臨光居洛十五年天下以爲
眞宰相田夫野老號爲司馬相公婦人女子亦知其爲
君實也及入臨衛士以手加額曰此司馬相公也所至
民遮道聚觀馬至不得行曰公無歸洛留相天子活百

姓同上

歐陽文忠公在政府凡兵民官吏財利之要中書所當知者集爲中書總目遇事不復求之有司

言行錄

國制凡詔令皆中書門下議而後命學士爲之至熙寧間有內降手詔不由中書門下共議蓋大臣有陰從中而爲之者至京則又患言者議已故作御筆密進而丐徽宗親書以降謂之御筆手詔違者以違制坐之事無巨細皆託而行至有不類帝札者羣下皆莫敢言由是貴戚近臣爭相請求至使中人楊球代書號曰書楊京後病之而不能止矣

宋史

今參知政事恩數比門下中書侍郎在尙書左右丞之

上其議出于李漢老漢老時爲右丞蓋按省轉廳可徑
登揆路也呂丞相元直覺此意排去之然自此遂爲定
制老學菴筆記

舊制京朝官屬吏部國初以來皆出是中書至是詔京
朝官奉使從政于外受代而歸者並令中書舍人考校
勞績品量材器以中書所下之員引對而授之謂之差

遣院通鑑

凡不由三事直拜中舍者謂之撻額裹頭山堂肆考

哲宗卽位詔起司馬光知陳州過闕留爲門下侍郎既
而蘇軾自登州召還緣道人相聚號呼曰寄謝司馬相
公毋去朝廷厚自愛以活我通鑑

司馬光折簡與呂公著曰光以身付醫以家事付愚子
惟國事未有所託今以屬公

同上

曾鞏擢中書舍人屬新官制遂掌書命于是更置百官
舊舍人無在者已試卽入院方除日填委占紙肆書初
若不經意午漏盡授草院吏上馬去凡除郎御史數十
人以本法意原職守而爲之訓勅者人人不同咸有新
趣而衍裕雅重自成一家

言行錄

曾鞏擢中書舍人不俟入謝諭使就職時自三省至百
執事選授一新除吏日至數十人舉其執事以戒辭約
義論者謂有三代之風

同上

劉敞字原父在西掖時一日追封皇子公主九人敞將

下直爲之立馬卻坐一揮九制數千言已就

神宗實錄

國初知制誥必召試而後除循唐故事也近例凡自起居舍人除中書舍人者皆不試蓋起居舍人遇中書舍人缺或在告則多權行詞而已試之矣故不再試遂爲故事

按避暑錄話云唐制誥以掌進畫翰林學士初但爲文詞不專詔命自校書郎以上皆得爲之班次各視其官亦無定員故學士入皆試五題麻詔勅詩賦而舍人不試蓋舍人乃其本職且多自學士遷也學士未滿一年猶未得爲知制誥不與爲文歲滿遷知制誥然後始並直本朝旣重學士之職率自知制誥遷

故不試而知制誥亦循此制不試雍熙初太宗以李文正沈及宋湜王化基爲之化基上章辭不能乃始令中書並召試制誥二首遂爲故事

按歐陽公歸田錄國朝之制必先試而後命有國以來不試而命者纔三人楊億陳堯佐及修忝與其一爾

又按文獻通攷云故事入西閣皆中書召試制誥三篇惟梁周翰不召試而授其後楊億陳堯佐歐陽修亦如此例

又按會要云元豐七年十月詔起居郎楊景略左司郎中錢總並爲中書舍人免試元祐元年起居舍人

蘇軾擢爲中書舍人十二月直龍圖閣劉攽爲中書舍人並免試

至道元年以呂端同平章事初帝欲相端或曰端爲人

糊塗帝曰端爲人小事糊塗大事不糊塗遂相之

通鑑

國朝太宗時朝廷每除一舍人六親相賀諺云一佛出世

故事命相進三官朱勝非特進五官

濼祐以前權臣柄國以爵祿市私恩取吏部缺歸中書

號曰堂除已三四十年杜範以清中書之務惟留書庫

架閣京散及要地幹官移歸吏部

宋史

元祐元年余爲中書舍人時執政患本省事多漏洩欲

于舍人廳後作露籬禁內省往來余曰諸公應須簡要
清通何必栽籬插棘諸公笑而止明年竟作之 仇池筆記

宋時以丞相爲老鳳翰林學士爲大鳳紫薇舍人爲小
鳳 東軒筆錄

宋陳后山詩云一官早要稱三字注云三字謂知制誥
又王禹偁詩云螭頭早要居三字出郡終須借一麾 山
堂肆考

蘇子容詩云起草才多封卷速把麻人眾引聲長蘇子
詩云明日白麻傳好語曼聲微繞殿中央蓋昔時宣制
皆曼延其聲如歌咏之狀張天覺白小鳳拜右揆有旨

下閣門令平讀遂爲故事 老學菴筆記

按山堂肆攷云唐通事舍人宣語多不知書至宣讀輒失句讀故事拾遺圈句低聲以助之謂之把麻

渡江初呂元直爲相堂厨每廳日食四千至秦檜之當國每食折四十餘千執政有差於是始不會食胡明仲侍郎曰雖要件食不可得矣 鶴林玉露

淳熙二年九月葉衡罷五年三月史浩相不設宰相者三年 宋史宰輔年表

仁宗問王素孰可命以相事者素曰惟宦官宮妾不知名者乃可充其選仁宗曰如此則富弼可素曰陛下得之矣

宋高宗謂宰執曰朕思安民之道無過擇監司郡守可
令侍從公舉仍不限員數中書置籍朕亦書之屏風置
諸左右

山堂肆考

史魏公自少保六轉而至太師中間近三十年福壽康
寧本朝一人而已文潞公自司空四轉蔡太師自司空
三轉秦太師自少保兩轉

老學菴筆記

秦檜相制下朝士相賀獨吏部侍郎晏敦復有憂色曰
姦人相矣聞者皆以其言爲過

通鑑

宋度宗咸淳三年三月置機速房于中書省賈似道上
書言非臣下馳驅聯絡氣勢不可帝曰師相豈可一日
離左右乃建機速房以革樞密院漏洩兵事稽遲邊報

之弊 春明夢餘錄

按 國朝雍正乾隆間設軍機處于乾清門右行走
大臣于閣臣及部院堂官選入起稿繕寫官則于內
閣中書內選入亦間有用部曹者所司承旨繕寫
上諭議奏機密重事及廷寄督撫等諭旨凡發出
諭旨及 批下奏摺俱由軍機處交票簽處傳抄
其不發抄者皆詳記檔案焉

賈似道十日一朝時襄樊圍急似道日肆淫樂方與羣
妾踞地鬪蟋蟀狎客戲曰此亦軍國重事耶 通鑑

周必大參知政事帝謂之曰執政于宰相固當和而不
同前此宰相議事執政更無語何也必大對曰大臣自

相可否自秦檜當國執政不敢措一詞後遂以爲當然
陛下虛心無我人臣乃欲自是乎雖小事不敢有隱則
大事何由欺蔽帝深然之 同上

元祐以前執政官率數日一聚政事堂事多決于其長
同列莫得預是後始命同集遂爲定制 宋史

金宰輔圖形衍慶宮韓企先張浩石琚紇石烈良弼 金史

金宰輔配享太祖廟庭韓企先配享世宗廟庭張浩石
琚紇石烈唐括安禮配享宣宗廟庭高汝勵僕散端
同上

韓企先歷相兩朝幾二十年 元史

元丞相鐵木兒塔識丞相康里脫脫之子別兒怯不花
丞相阿忽台之子拜住丞相安童之孫脫脫丞相伯顏
之侄 同上

許有壬歷事七朝仕宦垂五十年 同上

趙世延卒年七十七歷事七朝敷歷省臺五十年 同上

元宰輔李孟三入中書 同上

按宰輔年表耶律鑄脫脫皆三入中書伯顏安童忽
都察兒太平皆兩入中書

元不設丞相者共六年至元十五年至十八年至正二
十一年至二十二年

至元十三年至十四年忽都察兒獨相二年二十二年

至二十四年安童獨相三年二十九年至大德二年完
澤獨相七年至治二年至三年拜住獨相二年至順元
年至二年燕帖木兒獨相二年順帝至元二年至五年
伯顏獨相四年至正四年至五年阿魯圖獨相二年至
正十年至十三年脫脫獨相四年十九年至二十年太
平獨相二年

元史宰輔年表

元丞相塔思不花等言朝廷璽書不由中書徑令翰林
頒給者自大德六年至今凡六千三百餘道皆干土田
戶口錢穀銓選獄訟害民妨政之事請悉追奪後凡不
由中書者乞勿行之制可

通鑑

至大三年復行內降旨因尙書省言三公內降之旨曩

中書省奏請不行臣等謂宜仍舊行之倘于大事有害則覆奏請中書之務乞以盡歸臣等從之四年詔復停

內降旨

同上

吉水劉充化雖瞽而能吟嘗賦十閣老詩但不依次序或名或字號蓋取叶韻故耳嘗過予口占因錄之皇明內閣秉鈞衡吉郡堂堂已十人東里士奇後來名尹直

南臯

蕭鑑

先進是陳循定之安簡胡光大純道彭華解

縉紳千載貞元嘉會合天教諸老佐昌辰

瑣綴錄

明時稱大學士曰閣學今但稱中堂而稱學士爲閣學按閣學之名起于宋宣和末陳亨伯爲龍圖閣直學士稱龍學顯謨徽猷二閣直學士欲效之而難于稱謨學

猷學乃易閣學然古稱大學士止曰大學明殿閣詞林
記又有殿學閣學詹學諸名

香祖筆記

明代閣臣入直呵殿至聲聞禁中

同上

內閣職業重于中書省體統尊于三公府府省之名雖
廢而內閣之權益隆矣

春明夢餘錄

大約一榜中有一相者有二相三相者以四相爲盛洪
武庚辰文淵胡廣謹身楊榮武英金幼孜楊溥正統戊
辰文淵彭時華蓋萬安劉吉謹身劉珣景泰甲戌華蓋
徐溥武英邱濬宮保學士彭華尹直成化丁未華蓋費
宏謹身蔣冕毛紀武英石瑤弘治乙丑華蓋嚴嵩謹身
翟鑾武英方獻夫顧鼎臣若至五相者則嘉靖辛丑中

極高拱武英嚴訥潘晟文淵陳以勤高儀

弇州盛事述

按三元考尙有四相五相及八相者永樂乙未華蓋
許彬張益陳循謹身高穀隆慶戊辰于慎行東閣王
家屏文淵陳于陞文華朱賡武英張位建極趙志臯
中極沈一貫萬厯癸未中極葉向高方從哲東閣李
廷機武英朱國祚乙未武英何宗彥中極劉一燝建
極顧秉謙文淵孫如游朱延禧戊戌文淵周如磐周
道登武英何如寵中極溫體仁甲辰東閣孫承宗程
國祥來宗道建極吳宗達魏廣微中極黃立極文淵
徐光啟丁未東閣謝陞建極施鳳來中極張瑞圖文
淵錢龍錫黃士俊成基命李標武英丁紹軾而謝陞

至本朝復入相癸丑武英周延儒李國譜馮銓文淵
劉鴻訓東閣楊景辰吳牲范景文王應熊而馮銓至
本朝復入相丙辰已有東閣錢士升林釭文淵魏照
乘賀逢聖至福王時阮大鍼朱大典呂櫻瞿式耜亦
相而洪文襄承疇至本朝入相己未已有東閣何吾
騶劉宇亮文淵姚明恭孔貞運范復粹武英薛國觀
至~~福~~王時吳炳馬士英姜曰廣朱繼祚亦相而金文
通_{之俊}至本朝入相天啟壬戌已有東閣文震孟傅
冠方逢年蔣德璟文淵方岳貢武英張四知建極陳
演而福王後又有黃道周文安之王錫衮入相蔣德
璟復相天啟乙丑已有東閣黃景昉李建泰邱瑜至

唐王時路振飛熊開元亦入相而宋文康權王文通

永吉

黨寶鷄

崇雅

至本朝入相李建泰至本朝復入

相

憲宗時昭德恣橫進寶玩者則傳旨與官萬安劉吉劉

翊三人不出一語正球故時有紙糊三閣老泥塑六尙

書之謠

震澤紀聞

李東陽劉健謝遷三人在孝宗朝共事志相得也時人

爲之語曰李公謀劉公斷謝公尤侃侃

明史稿

劉閣老吉屢干清議言官論之輒得溫旨人謂劉棉花

以其愈彈愈好也

治世餘聞

魏藻德崇禎十三年殿試第一十五年擢禮部侍郎兼

東閣大學士入閣輔政藻德力辭部銜乃改少詹事正

統末彭時以殿試第一人踰年卽入閣然仍故官修撰

未有超拜大學士者

明史稿

明宰輔配享太廟只徐達一人

同上

明世無眞拜三公者有之自張居正始隆慶九年晉居

正太傅上柱國天啟三年又晉葉向高太傅上柱國

同

上

洪武元年徐達北征中原二年十二月還京三年北征

十一月還京李善長獨相者三年四年李善長致仕徐

達出征北平汪廣洋正月任至六年正月遷廣東參政

獨相者二年六年汪廣洋遷廣東參政十年九月復相

十二年十二月謫海南胡惟庸自四年正月相十三年
正月賜死中間獨相者六年十八年三月朱善相九月
卒善獨相者七月嘉靖十年七月張孚敬罷九月李時
相翟鑾獨相者兩月十四年孚敬罷十五年夏言相李
時獨相者二年二十七年夏言罷嚴嵩在位獨相者一
年萬厯二十六年趙志臯養病張位閑住沈一貫在位
獨相者四年三十四年一貫罷朱賡在位獨相者二年
三十六年朱賡罷李廷機養病葉向高在位獨相者五
年四十二年向高罷方從哲在位獨相者七年嘉靖四
十四年三月袁煒病歸至四月嚴訥李春芳始相徐階
獨相者兩月

明史稿宰輔年表

四入內閣者張文忠孚敬夏文愍言三入內閣者費文

憲宏再入內閣者黃文簡淮楊文定溥商文毅輅李文

達賢楊文忠廷和楊文襄一清翟文懿鑾高新鄭拱弁

州盛事述

按春明夢餘錄所載明大學士五次召入閣者張文

忠孚敬考輔臣年表載嘉靖十五年第五次召入閣

未任卒是以只云四次入閣也

按輔臣年表所載再入內閣者尙有彭文憲時謝文

正遷桂文襄萼王文肅錫爵王文端家屏葉晉江向

高韓蒲州曠周宜興延儒賀江夏逢聖

又按弇州盛事述載再長中書者尙有李善長汪廣

洋二人

狀元入內閣者永樂時胡文穆廣陳芳洲循宣德馬侍

郎愉曹文忠勳正統商文毅輅彭文憲時成化謝文正

遷費文憲宏弘治顧文康鼎臣嘉靖李文定春芳及今

申公時行凡十一人其中入閣而不得大學士者馬曹

二公也官大學士而非入閣者吳公伯宗也入閣又為

大學士而止五品者胡公也同上

按輔臣年表所載其後尚有朱秀水國祚周宜興延

儒錢嘉善士升文吳縣震孟黃順德士俊魏通州藻

德是以何義門倬有云明以一甲三人為榮選狀元

八十六人入相者自胡廣至魏藻德十七人榜眼探

花入相者自楊榮至傅冠三十人

按宰輔年表榜眼入相者苗衷陳文呂原徐溥呂調陽潘晟王錫爵李廷機吳道南史繼階孫承宗施鳳來賀逢聖孔貞運傅冠十五人探花入相者岳正劉定之王鏊靳貴徐階袁煒余有丁趙志臯吳宗達張瑞圖林鈺十一人而三元考載楊榮福建解元二甲一名進士其餘三人無可考

又查苗衷之前尙有黃子澄洪武乙丑探花相建文又查傅冠之後崇禎丁丑榜眼陳之遴庚辰探花高爾儼癸未探花陳名夏皆至 本朝入相

曹文忠魚中京闈第二名署代州訓導上章言年少寡

學未堪為師願就太學讀書以需再試或授別職亦得
自進命授幕職遂改太和縣典史許赴南宮癸丑得雋
大魁天下後至少宰兼學士入閣雙槐歲抄

舊例文臣京職七十方面以上六十五致仕其過期而

留任者正統中楊文貞士奇年八十以首揆終嘉靖初

謝文正遷以八十復相明年乃致仕嚴分宜嵩八十三

始免萬文康安楊文定溥以少保卒時年俱七十五楊

文襄一清以少師罷時年七十六陳少保循在首揆時

年七十三同上

我朝閣臣壽最高者惟劉洛陽健年九十四湧幢小品

黃淮歷事六帝致仕二十餘年卒年八十三明史稿

國朝之早達者李文正東陽五歲以奇童舉善大書入

翰林肄業楊少師廷和十二歲舉鄉試楊少師一清十

四歲舉鄉試蔣文定冕十五歲中解元李少師東陽費

少師宏張太師居正並十六歲中鄉試李少師東陽十

七歲中會試解學士縉十八歲中鄉試明年成進士楊

少師廷和十九歲中會試費少師宏二十歲舉狀元徐

少師階二十一歲及第弇州盛事述

按明史稿載方獻夫弱冠舉進士于慎行十七舉於

鄉

閣臣之晚達者邱文莊濬張文簡璧七十餘始入閣焦

泌陽芳七十餘始以侍郎拜太宰同上

李東陽立朝五十年 國朝列卿記

師弟同居內閣者李文達賢以吏書學士入內閣而薛

文清瑄以禮侍學士繼之賢薛公之講學門人也楊少

師廷和為靳宮保貴座師靳公又嘗受業于楊少師一

清二楊先後入皆同官袁少傅焯為徐少師階督學所

取士張江陵為徐公教習庶吉士弘治乙丑謝少傅遷

廷試讀卷已丑與是科進士翟公鑾同居內閣正德庚

辰石少保瑤以禮侍主考丁亥罷相是科進士張孚敬

實代之嘉靖戊戌分宜以禮書知貢舉辛酉與是科及

第進士袁公焯同居內閣 弇州盛事述

有明八十八榜自鄉試至廷試皆第一者只商文毅公

幣 一人官至謹身殿大學士

首甲三人無俱至內閣者惟嘉靖壬戌第一人申時行
爲少師中極殿學第二人王錫爵爲宮保武英殿學第
三人余有丁至少傅建極殿學真可謂光絕千古 同上

按烈皇小識云萬曆丙辰不考館選而鼎甲三人皆
大拜狀元錢士昇榜眼賀逢聖探花林鈺

按三元考載萬曆丁未狀元黃士俊榜眼施鳳來探
花張瑞圖亦皆大拜

內閣同鄉永樂初選翰林臣入內閣而江西居其五吉

水解學士 縉 胡文穆 廣 廬陵楊文貞 士奇 南昌胡賓客

儼 新淦金文靖 幼孜 皆吉安府而官皆至五品景泰中

陳芳洲循以少保首揆而蕭孟勤鑑以太子少師位第

四二公皆太和人也成化初陳莊靖文彭文憲時俱以

太子少保劉文安定之以工侍俱兼學士在閣無他相

參之三公皆吉安人也最後彭文思華以太子太傅尹

文和直以太子少保俱兼學士在閣又皆吉安人也江

西吉安之盛如此正德間楊文襄一清靳文僖貴楊以

少傅靳以太子太保同為武英殿學同為丹徒人嘉靖

時郭安陽朴高新鄭拱同日大拜至隆慶初同為少傅

吏部殿學亦同歲而罷又吾直隸華亭徐公階以少師

常熟嚴公訥興化李公春芳俱以太子太保同在內閣

萬厯初南直隸吳縣申公時行以少師歙縣許公國以

少保在內閣而王公

錫爵

以宮保繼之三公皆在大江

以南則尤盛也而申王又為同郡按永樂之五人僅五

品成化之三人不登一品則吾直隸為勝若夏貴溪嚴

分宜同官少師而好不終焦泌陽

芳

以少師任華蓋劉

鈞州

字

以少傅任文淵劉僅六日而予告又俱以附中

官入削籍無論矣

弇州盛事述

于慎行萬厯三十五年由禮部尚書入東閣趨朝甫一

日遺疏告終

宰輔年表

唐宰相二親具存者惟郭元振一人國朝則常熟嚴養

齊

訥

興化李右麓

春芳

張大岳

居正

湧幢小品

按明史稿云李春芳致政歸而父母尚無恙晨夕置

酒食爲樂鄉里豔之又嚴訥致政歸里父母皆在晨夕備物孝養人以爲榮又黃士俊歸而父母皆在堂二相同時極品正德四年李東陽首揆焦芳次之七年李仍首揆楊廷和次之十四年楊首揆梁儲次之皆少師太子太師吏部尙書華蓋殿大學士而楊與梁又皆特進左柱國四公皆同年爲一時之盛惜焦以附中官見詆于時

弇州盛事述

翰林舊選學士六七人入直內閣掌誥勅後止輪一人專掌多挨次入閣者吳寬以司制誥久雖不相例稱閣老蘇郡閣老坊猶存

國史唯疑

內閣外出者永樂中解縉爲廣西參議胡儼爲國子祭

酒宣德中張瑛陳山以干請諸司改瑛爲南禮部山專
教內書堂景泰中江淵出爲工部尙書俞綱出佐兵部
許彬出爲陝西參議徐有貞出爲福建參政天啟中岳
正謫爲欽州同知後官止于翰林供事不復再入
春明夢餘錄

按史料云解大紳出爲廣西右參政張子玉出理南
部猶帶殿銜俞綱出佐兵部以南禮部終江世用出
爲工部尙書許道中出爲陝西參政以南禮侍致仕
徐元玉出爲福建參政尋就逮戊岳文肅出爲欽州
同知口以興化知府致仕自岳後無下遷者

內閣之建置定制于永樂而崇重于弘宣之間其不立

宰相也遵皇祖之典訓而用詞臣入直以五品官參預
票擬則倣唐宋翰林之制而參用之已而參掌握機務
參列公孤無宰相之名而有其魁柄詞臣由此益重先
輩有遷禮侍者謝賀客曰吾今日出爲有司矣厥後規
制小變枚卜閣員多用部銜推舉而經筵纂修記注應
制之事尚屬翰林號文學侍從之臣他曹莫敢望焉錢
牧齋內閣小識跋

內閣久任楊文貞公士奇 歷三朝四十三年楊文敏公

榮三十五年金文靖公幼孜 二十五年楊文定公溥 二

十一年陳芳洲循 十三年商文毅公輅 前後十七年彭

文憲公時 前後二十年李文達公賢 十年劉文穆公吉

十九年徐文穆公溥 十二年劉文靖公健 二十年謝文

正公遷 十一年李文正公東陽 十七年楊文忠公廷和

前後十四年費文憲公宏 前後十三年張文忠公孚敬

八年春明夢餘錄

按明史稿輔臣年表則又載金文靖幼孜 在閣三十

年商文毅輅 在閣二十年楊文定溥 在閣十七年謝

文正遷 在閣十四年楊文忠廷和 在閣十七年其後

尚有嚴分宜嵩 在閣二十一年徐文貞階 萬文康安

俱在閣十八年胡文穆廣 在閣十七年黃文簡淮 張

文忠居正 俱在閣十六年申文定時行 在閣十四年

沈文恭一貫 高文毅穀 李文安本 俱在閣十三年劉

文和 翊 梁文康 儲 葉文忠 向高 翟文懿 鑾 夏文愍 言

俱在閣十二年曹文忠 勳 王文肅 錫爵 俱在閣十年

其餘十年以內者不及備載

永樂北征凡四其二則胡文穆 廣 以文淵閣學與楊文

敏 榮 金文靖 幼孜 扈從其後二則金楊二公俱以文淵

閣學扈從宣德征漢庶人一楊少傅 士奇 楊宮傅 榮 金

宮保 幼孜 楊學士 溥 從巡邊二其一則三楊與金其一

獨三楊從正統北征曹學士 勳 張學士 益 從正德征寧

庶人梁文康 儲 蔣文定 冕 從嘉靖南幸承天夏文愍 言

從唯征漢庶人有勅與蹇少師夏少保同參預機務 弁

州異典述

內閣若楊文襄之督三邊翟文懿之巡九鎮皆起自家
俱改兼部職楊文敏之使寧夏甘肅與寧遠西寧謀軍

務其時閣體未重至景泰中王毅愍文勘南直隸事情

高文義穀以祭告江海二公皆兼賑濟江少師淵督察

四川軍情理糧餉則事體異矣弘治末闕里告完李文

正東陽以次輔致祭兼撰碑蓋重其事也同上

宣德間諸學士每早與閣臣會食乃退正統九年陳循

入閣後學士惟劉鉉一人過自遜謝朝退止于東閣不

復會食視誥勅以後學士皆因之至誥勅悉委于中書

而中書稱爲內閣書辦春明夢餘錄

按書辦之稱今施之胥吏原其始當是以美稱假借

之耳今翰林院有待詔而俗以稱鑼工六部有司務而俗以稱梓匠大夫郎中今南北以稱醫生相公最尊而北方爲卑幼之常稱此豈可謂俗稱在前而官名反用之耶館閣漫錄載翰林學士太常寺卿貳皆謂之內閣書辦則當時尙不以稱吏胥可知也

內閣出爲六卿者皆不帶閣銜卽出將如楊公一清自

家起改兵部尙書左都御史總督三邊奉詔而閱九邊

如翟公鑾亦改兵部尙書兼右都御史唯華蓋殿大學

士張瑛以原官掌南京吏部然詘之也文淵閣大學士

孫公承宗則亦以原官督理遼薊津登軍務自邊累官

至少師中極殿則出將入相者本朝惟中山高陽二公

而已然中山帶相銜而實不與機務則又似高陽獨也
春明夢餘錄

舊制禁中不得舉火皆出食于外宣德中始令置厨庖

會食中堂

同上

嘉定宣嗣宗爲中書舍人宣宗幸內閣以銀錢撒地令
諸從官競取嗣宗俟諸臣取畢徐拾一文

萬圃雜記

楊士奇新改華蓋殿學士入奏上望見謂蹇義夏原吉
曰新學士來奏事必有理試共聽之士奇言析薪傳旨
賦北京山東棗八十萬供宮禁香炭之用雖是歲例得
無過多上曰朕固知學士言有理卽令減除四十萬

朝聖諭錄

仁宣朝大學士以太子經師恩累加至三孤望益尊而
宣宗內柄無大小悉下之大學士楊士奇參可否自是
內閣權日重至世宗中葉夏言嚴嵩迭用事遂赫然爲
真宰相歷制六卿矣

明史職官志

宣德五年廷策諸士上臨軒發策畢退御武英殿賦策
士歌以示諸讀卷官

春明夢餘錄

弘治乙丑廷試上于宮中焚香籲天期得真才以濟實
用

同上

永樂甲辰進士邢寬第一梁禋第二孫曰恭第二首甲
姓名皆硃書

雙槐歲抄

明殿試讀卷官賜宴文華殿西室遣內監出陪于慎行

詩云臨軒五度擢英才品第連朝直帝臺香案前頭文字進殿門西畔俎筵開清班許從元公列曲晏傳教內監陪聖代得賢應有頌遭逢惟祝泰方來

同上

嘉靖己丑廷試上閱諸卷于羅洪先卷批曰學正有見言儻而意必忠宜擢之首于程文德卷批曰探本之論于楊名卷批曰能守聖學以爲本此知要之說于唐順之卷批曰條論精詳殆盡于陳東卷批曰仁知之用本諸吾心此不易之論于任瀚卷批曰勉吾敬一之爲主忠哉羅洪先一代大儒上首拔之時稱得人乙未廷試上批韓應龍卷曰是題本意可第一甲第一名批孫陞卷曰說仁禮之意可第二名批吳山卷曰敬爲心學之

極可第三名

同上

崇禎戊辰廷試閱卷擬劉若宰第一莊應會次之上翻
駁再三竟用劉第一而抑莊爲二甲首其第二第三皆
特拔第三管紹寧誠字少一撇御書足之因自號誠齋
甲戌廷試閣擬李焜爲第一上在文華殿翻閱初進十
二卷頃之閣臣趨出入閣再搜十二卷以進特拔第二
十二卷劉理順爲狀元而抑李焜爲二甲第二第二楊
昌祚第三吳國華皆特拔也庚辰殿試上御輿蓋下丹
墀徧觀諸進士對策及十六日呈進十七日忽召四十
人對文華殿遂拔通州魏藻德第一鄞縣葛世振靜海
高爾儼俱一甲而復拔趙玉森姚衡劉瑄孫一脈嚴似

祖爲簡討蔣德燦王錫爵教習之周鼎爲科道吏部主
事有差癸未廷試在九月是年以兵事改八月會試上

同

永樂十年十一月大學士楊榮經畧甘肅軍務此閣臣

經畧軍務之始

憲章類編

殿閣大學士不預閣務者陳山宣德四年出教內豎張

瑛亦以是年丁憂除掌南禮部

弇州史料

預閣務不與閣臣職者宣德中詔少師吏部尙書蹇義
少保太子太傅戶部尙書夏原吉輟部事朝夕侍左右
備顧問賜珊瑚筆格等物然不與閣臣職

同上

予在翰林時聞諸陸廉伯曰內閣故有絲綸簿楊文貞
晚年欲媚王振竟以此付之及余入閣歷朝詔誥底本

皆在非所謂絲綸簿乎廉伯之言不知何所從授天下
皆傳之

震澤長語

按唐樞列流測云問絲綸之復歸內閣我皇上英力
妙算所以嚴政本然不有張公璉孰遵承之故內閣
票過奉旨事件開載揭帖類進與六科旨意題本逐
日對同亦自張公璉始人臣操口代之重張不惟承
革宿弊且能有所自處正德末錢寧家搜出題本四
十餘件江彬家搜出阻抑邊情本一百三十六件司
禮監隱情不報本數百件壅閉之患左右之者不明
避豈自福之道

又按本朝內閣所存絲綸簿乃逐日所下本章上載

旨意下載事由與詔誥底本有別而列流測所載如此既云復歸則必有付與人者在

按復辟錄初朝廷旨意多出內閣臣條進橐留閣中號絲綸簿其後宦侍專恣時奏收簿秘內徐有貞既得權寵乃告上如故事還簿閣中

景泰二年五月直文淵閣戶部侍郎江淵巡視淮徐諸郡此內閣巡視外郡之始

憲章類編

成化辛卯十一月彗星見廷臣皆謂上下懸隔情意不通所致彭時等請召面議于是內廷乃約許召對復戒不宜多言既見但云天變可畏上曰朕已知矣萬安與彭時商輅遂連連叩頭同聲呼萬歲命賜酒飯而退諸

太監謂人曰嘗言不召見及見無一忠言奇謀止呼萬歲四方因傳爲萬歲閣老

毅皇帝自稱威武大將軍勒內閣寫勅大學士蔣冕至以死捍卒別取勅行之有勅必有印蔣所執曰臣不敢名君禮部則無辭以拒矣

湧幢小品

萬曆十三年詔起侍郎王錫爵爲文淵閣大學士時首相爲申時行直隸吳縣人次相爲許國直隸歙縣人三人皆產直隸一奇也二人同一府二奇也而尤異者時行壬戌狀元錫爵同科會元國辛酉解元三人各占一元自有殿閣以來無此盛事

窺天外乘

孫高陽承宗曰閣體重首輔其圖事揆策主之首輔當

予陪末綴每見上傳首輔主裁語不及次首輔卽賢次
輔以下豈無一得當上或間與首輔相參差而兩意各
主朝士之從意者隨分蓋自古分合之議竟與國運相
隨也 春明夢餘錄

孫高陽承宗曰朝廷生殺予奪之權閣臣不顯操而賢
者得君以行其公遂能任生殺予奪而天下治不肖者
得君以行其私亦能竊生殺予奪而天下亂故閣臣不
必有其權而有其任 同上

宋徽宗立書畫學書學卽今文華殿直殿中書畫學卽
今武英殿待詔諸臣然彼時以此立學時有考校今止
以中官領之不關藝苑無從稽其殿最故技藝之精遠

不及古矣

穀城山房筆塵

崇禎三年命武英殿中書畫歷代明君賢臣圖書正心誠意箴于屏置文華武英兩殿

崇禎遺錄

王司寇世貞曰閣臣於體至貴倨也視百司乃無重相壓何以相稱焉其喜怒借上意故不嫌逼也威福間已意故下屏息也創自由六曹故難不與也裁取以詔行故眾無敢訾也賢者當之不見跡而治不肖者當之不及敗而亂此在人主擇矣

春明夢餘錄

舊制輔臣辰入申出率以爲常崇禎壬申後必二鼓始出及巳卯後遂至四鼓始出間或有徹夜者周宜興至始議輪一人宿精微科候傳票精微科九間在午門外

西廡其南兵科直房也

同上

按國朝中書科在兵科之上當卽是精微科舊址也

崇禎中上設游藝堂爲涉畧文史之地有所疑下之武英殿掌殿中官中官以問供事中書

客燕雜記

古來相業之盛莫如北宋劉莘老謝右僕射表曰君臣賡歌今百三十載勳名繼踵纔五十二人可見得人之難乃明末崇禎十七年間拜罷遂五十人欲不亂得乎

香祖筆記

國初徐太傅

達

初入爲右相出爲大將軍征吳再出爲

征虜大將軍北伐入爲中書右丞相復出爲征虜大將

軍鎮撫東北正德中楊文襄一清以三邊總督入爲吏

部尙書內閣大學士致仕後復起爲三邊總督入爲少

師太子太傅吏部尙書武英殿大學士楊公勲業雖不

敢望太傅而事頗相埒弇州盛事述

南薰殿凡遇徽號冊封大典閣臣率中書篆寫金寶金

冊御用監必殺鹿一隻蒸魚一羹此舊典也蕪史

內法酒總名長春酒有上用甜苦二色給內閣者以黃

票學士以紅票傍秋亭雜記

何良俊曰近時各部之事皆聽命于閣下所不待言卽

雖選曹有員缺亦送揭與內閣然後注選春明夢餘錄

按內閣小識云直省提學官遇缺吏部文選司具應

用官一員姓名移手本于典籍廳典籍呈堂考定或用或否典籍移手本于文選司

閩人入閣自楊榮陳山後以語言難曉垂二百年無人至李廷機始與葉向高並命後周如磐張瑞圖林鈺蔣德璟黃景昉復相繼之

明史稿

關中人入閣者自馬自强始其後薛國觀繼之終明世惟二人

同上

明宰輔江南三十五人浙江三十二人江西二十六人直隸二十人湖廣山東各十三人河南十一人四川福建各十人山西七人廣東五人陝西廣西各二人雲南一人不知籍貫者一人共一百八十九人貴州無大拜

者

天順間命徐公

有貞

考察方面嘉靖間命李公

本分別

尙書至大小九卿去留張公

璉

奉勅肅清百寮韓公

熿

分別逆黨則政自閣出矣然張權掌都察院事李公因

冢宰李公默得罪亦未可全謂之政出于閣也政出于

閣者獨前武功伯與後韓蒲州

春明夢餘錄

明初不設宰相者洪武十七年至三十年中間惟朱善

相七月

明史稿宰相年表

申時行王錫爵先後秉政大旨相紹述繼者率以為法

時謂之傳衣鉢張至發代溫體仁亦然

明史稿

洪武十一年禁六部奏事不得關白中書省

吾學編

宣德四年七月上幸文淵閣冬十月庚辰幸文淵閣戊子又幸

大政記

國初

太宗文皇帝

世祖章皇帝幸內院披尋典墳咨訪治道

詞林典故

朝廷有命必傳之太監太監傳之管文書官管文書官乃傳至內閣閣臣有陳說必達之管文書官管文書官達之太監太監乃達至御前

春明夢餘錄

按管文書官卽今之紅本處是也凡通部閣臣先一日擬票于本日黎明送紅本處紅本處轉交內監內監於未刻進呈御覽旨意有增改內監傳之紅

本處紅本處傳之滿漢票簽滿漢票簽稟知中堂然後遵旨繕寫進呈

中書舍人以進士起家爲此者有官而無署其俗謂中書科者乃因與六科聯署而借言之實文移奏疏不入此字也其職惟用寶之時同符卿供事蓋尙是政府之遺體其他引班等職則以補科臣之不足亦以聯署而及之耳絕無繕寫之職其以選入制勅房者舊時進士亦爲之今以待舉人之高選

石民外集

明庶吉士俱于東閣進學

詞林典故

按明史稿云永樂二年選庶吉士明年成祖擇其中二十八人令進學文淵閣

又云宣德九年特簡史官庶吉士三十七人進學文

淵閣

按蓉塘詩話云國初庶吉士或在中書省或在文華

堂後改置翰林院

南充陳文憲公于陞乃文端公以勤之子宰輔年表

高陽李公蔚前明文敏公國楷子大明成公克鞏前明

文穆公基命子皆父子宰相池北偶談

前明大學士至本朝復入閣辦事者馮文敏銓謝清義

陞李曲沃建泰三人

本朝典制滿洲部院大臣必歷內閣學士乃得充經筵

講官歿得諡文居易錄

宛平相國文貞公

崇簡

之長子也父子同官禁林又同

爲學士後居政府者二十年辛巳以疾告卒年七十六
香祖筆記

康熙二十一年琉球安南入貢遣編修孫卓儀制司郎
中周璨往安南檢討汪楫中書舍人林麇焜往琉球
池
北偶談

國朝六曹章奏悉沿明制惟事關緊急或涉瑣細則削
木牌而緣其首以滿洲字書節畧于上不時入奏取
旨不下內閣票擬謂之緣頭牌子蓋古方策之遺意也
同上

宋朝現任官得應制科文官許二次武官一次謂之鎖

聽 國朝惟內閣中書舍人貢監出身者許應鄉試舉
人出身者許應會試 同上

國初內三院滿洲大學士謂之榜式烏金超哈 即漢官

大學士亦稱榜式 同上

按滿洲又稱大學士爲阿立阿達稱內閣爲多爾濟
衙門

自明至 國朝士大夫相沿稱閣臣不舉其姓但稱其
本貫郡縣如李文勤公 霽 祇曰高陽是也尙書以下卽

不然順治末少宰胡宛委先生 兆龍 方爲內閣學士被

眷遇最渥士大夫稱爲山陰非故事也唐之中葉稱宰
相但舉其長安邸第所居坊里之名又與今異蓋一時

風尚云 居易錄

故禮部尚書王文貞公 崇簡 箋記云奏疏揭其要書於

後謂之貼黃外封所書事日日月謂之引黃明崇禎元

年輔臣李文敏公 國權 請章奏倣古貼黃之法撮節粘

原本以進至今因之 同上

按本朝外省督撫提鎮及學政本皆有貼黃在京惟

刑部命盜本則有貼黃

按石林燕語云唐制降勅有所更改以紙貼之謂之

帖黃蓋勅書用黃紙則貼者亦黃紙也今奏狀劄子

皆白紙有意所未盡揭其要處以黃紙別書于後乃

謂之貼黃蓋失之矣其表章畧舉事日與日月道里

見于前及封皮者又謂之引黃

又按古夫于亭襍錄云帖黃二字已引王文貞所云著之唐國史補云帖黃勅既行下有小異同曰帖黃一作押黃此與今章奏貼黃不同

又按江休復鄰幾雜志云宋審刑奏案貼黃上更加撮白撮白上復有貼黃不知撮白是何許語

按日知錄云崇禎時命內閣爲貼黃之式卽令本官自撮疏中大要不過百字黏附牘尾以便省覽

經筵講官例以尙書侍郎及內閣學士翰林掌院學士充大拜者則解講官惟徐崑山立齋以戶部入相乃掌翰林院事兼經筵講官己卯十一月熊孝感青嶽以吏

書張桐城敦復以禮書同日大拜皆帶經筵講官蓋三
臣在經筵最久故用異數非故事也

居易錄

汪文端公

由敦

史文靖公甲辰主禮闈所成進士也及

文靖再登政府重侍講筵卽補文端之缺亦僅見之事
也

蔣文端

赫德

順治丙戌丁亥己丑三科俱教習庶吉士

後至大學士者九人呂宮傅以漸李蔚三人同時任大
學士至今以爲玉堂盛事

八旂通志

本朝惟高陽李文勤公三典會試今孝感熊公以癸丑
甲戌丁丑庚辰癸未五典會試澤州陳公以壬戌辛未

癸未亦三典會試

香祖筆記

按雍正乾隆間三典會試者大學士中尙有人

朱文端公雍正癸卯甲辰乾隆丙辰

張文和公雍正癸卯甲辰乾隆丁巳

史文靖公雍正甲辰丁未乾隆乙丑

雍正乾隆間閣臣兼部務者並兩給俸米亦如之乾隆
初京官皆給雙俸而不給雙米惟閣臣之兼部務者仍
給雙米

本朝百餘年宗室大拜者三人順治十二年以覺羅巴
哈納爲弘文院大學士十八年又以覺羅伊圖爲弘文
院大學士康熙十六年以覺羅勒德洪爲文淵閣大學
士考之 玉牒雖有宗室覺羅之分而覺羅于康熙年

間尙在十服之內卽宗室也

本朝浙江大學士六人錢塘居其三黃文僖公

機

徐文

穆公

本

梁文莊公

詩正

海寧居其三陳文簡公

元龍

陳

文勤公

世倌

又有陳之遴籍雖隸海鹽而家則居海寧

也一朝宰相皆出一府而陳氏三人皆出一門爲不可

多得

雍正十年大學士鄂文端公經畧西北兩路軍營出嘉

峪關詩曰贊畫漫推須內相指揮難定甚諸蠻以從前

曾經畧苗疆也

無錫嵇文敏公卒趙泰安

國麟

相旨未下時史中書

嗣

彪

云見有設壇扶乩者預卜相名乩詩云折臂慶三公

蓋用羊祜故事時泰安跛一足也

柯崇樸字寓匏在中書日賦望江南詞十闋序云西清苦趣只是長饑薇省聲華原居禁近人懷厭離之思所以前輩孫紫靜先生為中書樂黃鶯兒十二闋刻畫事情膾炙人口余不揣固陋續為中書好望江南十詞非曰效顰聊供撫掌云爾

硯北叢談

中書好官守最清高躬捧封章趨玉陛手批天語出層霄應絕簿書囂
中書好公事更安閒三日始應班一換片時已把本全翻徐步出長安
中書好守晚也悠然政事堂虛堪對奕絲綸簿寫好安眠歸馬夕陽邊
中書好攜被直周廬寂寂綺牕燒樺燭沉

沉宮漏滴銅壺人與月俱孤
中書好退食午門前
四簋足供炎熱日一鍋共飯
沍寒天公費尙餘錢

中書好傳往
暢春園走馬揚鞭趨上苑
揮毫伸紙
代王言遊日遍郊原
中書好傲骨習來成長揖相
君稱弟子比肩學士喚先生
何事折腰輕
中書好
懶性最相宜無事趨朝勤待漏
有時閉戶自吟詩高
臥少人知
中書好時務特留神
少下本章因甚事
內批簡用是何人消息最爲真
中書好榮辱不關
心分乏勤勞蒙上賞也無叅罰
得相尋朝市卽山林
附孫紫靜中書樂黃鶯兒十二闋

夜半喜開顏想中書真美官
說與世人休輕看選遍

長安問遍朝班大小衙門都讓啣趁無眠略述幾件
妙處正堪傳 衙門整四間琉璃瓦別有天擡頭便
是金鑾殿白石欄杆朱漆門簾磨磚到處都鋪遍釘
銅環參天榻扇高麗紙糊顏 中書在裏間桌兒大
檯子寬豎櫃巍巍門後站土炕拐灣火盆滾圓頑石
硯臺長尺半到更闌還將燭點黏在半頭軋 宰相
是堂官受知遇非等閒勤勞時把中書讚查明本單
搭完草簽包好本皮挨次散散偶然間事出罕見檔子
大家翻 辛勤只半天註紅本寫真簽先生高叫齊
忙亂午後坐班檔子細填腹餓竟陪學士飯禮貌啣
張長李短側坐且閑談 來到午門前擺牙喇每次

盤口中者者連聲喚內閣哈番現在票簽放行不用
腰牌驗轉個灣新那三院一直往東邊三朝纔一
班起五更敢憚煩宰相尙無班可換筆在靴邊墨在
腰間火房紙匠聽呼喚牌子傳宿該今晚公被好安
眠見多還數啣通部本信手翻天下事情都曉遍
折票改簽啟奏上傳皇家規矩誰能見這其間新聞
無限不肯向人言朝賀免隨班鴻鴻補何用穿職
名不繫鴻臚管內直幾年堂上垂憐勅書大字從人
便老積年西廳一轉典籍便成仙名列縉紳編翰
林後詹事前印滿中間一大段也入內簾也把詔頒
試差各省尋常點出長安銀瓜黃傘簇擁小京官

寫貼不拘牽最燥牌侍生謙亞卿以上方稱晚輩有
後先揖尙右邊規矩不異翰林院拜堂官經年一遍
投個淡紅全實授要週年與臺中同一般逍遙試
俸何曾算職掌旣閒眼界又寬從容安穩熬陞轉這
樣官說來希罕聞者恐垂涎

顧梁汾舍人

貞觀

風神俊朗大似過江人物無錫巖中

允繩孫

贈詩曰瞳瞳曉日鳳城開纔是仙郎下直回絳

蠟未消封詔罷滿身清露落官槐

蓮坡詩話

舍人舊有以空銜借者故唐實君送查悔餘詩云舍人
官職是虛名查時爲孝廉也酬別有云窮無好句供傳
寫老不中書代解嘲正荅詩意云

同上

按 國初舉人會試後具呈吏部願就中書不入選班也旋里卽用內閣中書銜誇耀鄉里自有舉人考中書後此風遂止

內閣供事如各部院寺書吏皆古之史胥耳然考供事之稱舊亦施于尊官如館閣漫錄載弘治八年八月少詹事謝遷丁憂服闋至京上命陞詹事仍舊職入內閣供事正德五年二月勅進少保兼太子太保文淵閣大學士楊廷和爲吏部尙書兼武英殿大學士太子太保兵部尙書曹元爲吏部尙書兼文淵閣大學士供事內閣所謂貴賤不嫌同名耳

按筆塵云唐時中書省吏謂之主書堂後主書尤其

親密卽宋之堂後官也明朝供事之名加于宰輔尙不以名主書也

國朝大學士向無堂餐至雍正六年令各省督撫藩各出銀百兩爲內閣侍讀學士侍讀中書典籍飯銀而不及內閣學士後又于山海關稅平餘銀內賞給四千兩與中書等官學士亦與焉而不及大學士堂餐乾隆十四年撥戶部銀庫平餘銀一千兩戶部堂司官飯銀一千兩關差鹽差共二十五處各出銀二百兩每年共計一萬五千三百兩內存銀一千兩爲大學士學士堂餐其餘學士每年一百兩侍讀學士九十兩票簽侍讀八十兩本房侍讀七十兩中書協辦侍讀事者六十五兩

票簽中書六十兩典籍五十五兩本房中書五十兩滿
貼寫中書漢候補中書四十兩除學士及協辦侍讀外
俱分爲一二三等以五數遞減焉

溫福大學士溫達之孫舒赫德大學士徐元夢之孫皆
祖孫宰相傅恆大學士馬齊之姪高晉大學士高斌之
姪協辦大學士阿里袞大學士訥親之弟

本朝閣臣歷官最久者陳文恭公宏謀四十八年尹文

端公繼善四十九年張文和公廷玉劉文正公統勳皆

五十年張文貞公玉書五十一年王太倉相公揆五十

三年王文靖公熙五十五年陳文勤公世倌五十六年

史文靖公乙亥以前歷官已五十六年中間歷任五部

尙書未任者大八省督撫丁丑復召入閣至癸丑夏薨

又八年則歷官之久為古今所未有至徐文定公元夢

自登仕籍至食尙書俸以終共六十九年

桐城張文和公廷玉大學士文端公英之子常熟蔣文

恪公溥大學士文肅公廷錫之子尹文端公繼善亦大

學士尹文恪公泰之子皆父子宰相

本朝百餘年狀元入相者五人順治丙戌傅以漸丁亥

呂宮已亥徐元文乾隆丁巳于敏中己未莊有恭榜眼

入相者陳文簡元龍探花入相者梁文莊詩正各一人

而已其一科五入相者呂武進宮馮文毅溥王文靖熙

黃文僖機李文襄之芳三入相者丙戌傅聊城以漸李

高陽霽魏栢鄉裔介而馮文毅溥于是科中會試戊戌

陳澤州廷敬熊孝感賜履李文定公天馥庚戌李文貞

公光地王太倉揆張文端公鵬翮而陳溧陽名夏梁貞

定清標成大名克鞏張掖縣端杜寶坻立德五人前明

崇禎癸未進士也

本朝宰相在閣年久者馬文穆公齊三十一年李文勤

公霽二十七年張文和公廷玉二十五年傅文忠公恆

二十三年王文靖公熙張文貞公玉書史文靖公貽直

皆二十年范文肅公文程來文端公保皆十九年蔣文

端公赫德十七年陳文勤公世倌剛公林嵩公祝皆十

六年伊文端公桑阿十五年杜文端公立德李文貞公

光地甯文毅公完我巴文恪公泰蕭公永藻鄂文端公

爾泰皆十四年馮文敏公銓兩朝在閣亦十四年王文

恭公頊齡馮文毅公溥衛曲沃周祚覺羅勒公德洪索

公額圖明公珠車文端公克朱文端公軾徐文穆公本

皆十二年希文簡公福阿文清公蘭泰額文恪公色黑

王太倉揆查公郎阿皆十一年尹文恪公泰成大名克

鞏佛公倫皆十年而洪文襄公承疇圖文襄公海帶銜

出入或十八年或二十年

本朝大學士三入內閣者巴文恪公泰再入內閣者希

文簡公福馮文敏公銓陳溧陽名夏陳海鹽之遴王文

通公永吉熊孝感賜履圖文襄公海李文定公天馥馬

文穆公齊陳文勤公世倌史文靖公貽直蔣文端公赫

德車文端公克

本朝大學士在位享有高壽者四人來文端公八十三
史文靖公八十二高文恪公八十一陳文勤公七十九
致仕從容享有高壽者福文端公張文和公皆八十四
馬文穆公八十八徐文定公八十七陳文簡公八十
乾隆二年武殿試命大學士邁文恭公柱四人讀卷光
祿寺例于閱卷日送茶湯于讀卷官三人皆不飲獨文
恭飲之曰京師譏名不稱實者十事內有光祿寺茶湯
翰林院文章今翰林院文章既佳光祿寺茶湯亦美
桐城張文和公廷玉為大學士其弟廷瑑自工侍左遷

爲內閣學士後其子若霽由詹事陞內閣學士皆文和在閣時也弟兄父子同居禁林爲一時之盛

少年登科享有高壽重赴瓊林佳晏古今不可多得康

熙癸丑庶常徐文定公

元夢

至雍正癸丑以原任大學

士閒住在京丁丑庶常福文端公

敏

至乾隆丁丑以大

學士予告在京辛未探花黃叔琳至乾隆辛未以禮部

侍郎銜在籍世居京兆密邇春官已屬際遇之奇至溧

陽相國史文靖公以康熙庚辰庶常至乾隆庚辰尙居

首輔實爲

皇朝盛事

御賜詩云庚辰先進杏花芳

週甲重看蕊勝黃早識家聲孝山史羣稱風度曲江張

本衙門有新佳話國史院無舊等行寧獨縉紳慶人瑞

贊予文治底平康奉 上諭大學士史貽直康熙庚辰
科進士也今週甲尙在朝詩以賜之用彰人瑞文靖公
恭和 御製元韻 天藻流傳藝苑芳鸞牋香染 御
衣黃餘年幸沐 君恩渥春勝重看杏晏張一德敢云
襄盛治八旬猶愧廁鵷行忻依禁近邀敷錫 壽域
宏開第祿康

會試進 呈十卷候 御筆批定會元以下名第始於
康熙乙丑然考之玉堂漫筆宋朝故事每廷試卷前十
名御藥院先以文卷奏御定高下高宗建炎間始罷之
古人亦有行之者矣今殿試第三日讀卷例擬鼎甲三
人及二甲前七名凡十卷進呈 御覽往往有改易者

不盡依所擬名第也

居易錄

文殿試讀卷官擬票甲乙十卷進呈以待 欽定丁未

科原擬莊柱爲第一 世宗改爲二甲而以原擬第三

之彭啟豐爲第一癸丑科原擬張湄爲第一 世宗改

爲二甲第七而以原擬第二之陳倓爲第一張若靄原

擬第七 世宗將定爲一甲第三矣文和公聞之請見

力辭遂改爲二甲第一丙辰原擬黃孫懋爲第一 上

改爲第二而以原擬第六之金德瑛爲第一原擬第□

之秦蕙田爲第三丁巳原擬林枝春爲第一 上改爲

第二而以原擬第四之于敏中爲第一原擬第十之任

端書爲第三己未 上以原擬狀元之莊有恭爲第一

以原擬第六之涂逢震爲第二以原擬第七之秦勇均
爲第三壬戌原擬湯大紳爲第一 上改爲第三而以
原擬第二之金牲爲第一以原擬第五之楊述曾爲第
二乙丑原擬王際華爲第一 上改爲第三而以原擬
第四之錢維城爲第一原擬第三之莊存與爲第二戊
辰 上以原擬狀元之梁國治爲第一辛未原擬劉墉
爲第一 上改爲二甲而以原擬第六之吳鴻爲第一
壬申原擬張霽爲第一 上改爲二甲第二霽涓之子
也父子兩
擬狀元而以原擬第□之秦大士爲第一原擬第□之
范棫士爲第二以原擬第八之盧文弨爲第三甲戌原
擬汪永錫爲第一 上改爲二甲第一而以原擬第四

之莊培因爲第一原擬第三之王鳴盛爲第二以原擬
第二之倪承寬爲第三丁丑原擬梅立本爲第一上
改爲第二而以原擬第二之蔡以臺爲第一凡歷科殿
試卷皆貯內閣大庫上雖硃書甲第而下所擬之黃簽
猶存卷上是以得而知之

內閣設漢侍讀以來擬寫票簽是其職掌而額止二員
常以中書協辦其事余丁憂服闋來京候補典籍先謁
中堂中堂以內閣舊員于未補之前卽令協辦侍讀事
適余擬補典籍本至照例票依擬用簽典籍協辦已屬
創舉而擬票出自本人亦僅見之事也因附識之

中書典故彙紀卷八

跋

往在里中與脩郡志閱乾隆杭州府志藝文一史部有中書典故彙紀無卷數仁和王正功峩山撰顧求其書不可得今年十月飲劉氏堅匏盦翰怡京卿出示此書鈔本凡八卷前有杭大宗序峩山自序後有錢塘趙素門輯寧跋跋言丁酉秋拙餘捐館今取寫本復爲校補云云拙餘蓋峩山別字首冊一葉有殘字言刊書次第及引用書目仿日下舊聞式云云此本無引用書目殆趙氏將付刊而未竟其事者趙跋署乾隆壬子今相距一百二十二年此本猶在人間而國變以來官制紛更綸閣故事談者如夢緬想盛時不勝感喟此書攷古事

則原本經史攷本朝事則錄官書及私家撰述采摭頗富卷七題名終於乾隆三十八年李侍堯後此百餘年踵事無人則此書彌可寶貴矣本朝掌故之書最罕內閣衙門自雍正初設立軍機處以後題本票籤但循故事爰立或同備位舍人幾屬閒曹名雖華資實爲冷署其以才諳見稱者或倬直樞廷或別趨譯署鞅掌不暇無復從容鉛槧之人讀杭先生序所舉前代人撰著多至三十九種又歎古今人之果不相及矣丁氏杭郡詩三輯錄莪山詩無小傳并不詳其仕履府志漢陽同知亦誤莪山又訛作莪山得此可資改正趙跋云嘗讀書見山樓樓在王先生文誥南園是莪山爲南園子

姓也素門爲端人先生賢之子杭郡詩續輯作趙篋輯
寧或其改名端人箸淺山堂詩集杭先生序之素門子
之珠字次閑善分隸以篆刻名此又吾鄉先哲之當記
者故附志之癸丑嘉平月吳慶坻跋

子曰誠者天之道也思誠者人之道也

至誠而不動者天也誠之有動者人也

誠之者擇善而固執之者也博學之審

問之慎思之明辨之篤行之有弗能

知者學之有弗能行者力之知微知

鮮也知微知鮮也知微知鮮也知微

知鮮也知鮮也知鮮也知鮮也知鮮

也知鮮也知鮮也知鮮也知鮮也知

鮮也知鮮也知鮮也知鮮也知鮮也

知鮮也知鮮也知鮮也知鮮也知鮮

也知鮮也知鮮也知鮮也知鮮也知

鮮也知鮮也知鮮也知鮮也知鮮也

中書典故彙紀八卷王正功撰趙輯寧校補正功字拙
餘一字峩山錢塘人舉人雍正十三年考取內閣中書
轉典籍出爲襄陽府同知在閣二十餘年搜輯檔案以
成是書分官制職掌儀式恩遇題名六冊瑣事另爲雜
錄乾隆三十年成書輯甯字素門錢塘人著有淺山堂
詩集輯補在乾隆五十七年自來內閣衙門列朝均重
自雍正初設立軍機處爰立竟同伴食舍人更屬閒曹
名雖華資實則冷署道光初年直廬不戒於火章疏事
實悉付丙丁文獻無徵賡續更屬匪易此書前代則原
本經史本朝則采錄官書采摭綦詳有功掌故則學人
所共推者歲次柔兆執徐冬月吳興劉承幹跋

視其誰咎效矣柔兆時翁冬月吳興隱承神魁

本靈史本時限宋稔官書宋無基精育如掌效限學人

實悉於西丁文輝然野嵐巖更飄飄畏北書前升限烈

各難華資實限合署數米味平直斷不派效火章施事

自華五時端立軍繼風受立資同科倉舍人更風圓曹

高集時蘇立彈到五十十平自來內閣滿門既博世重

和神到三十平如書備留宅業門疑限人善育對山堂

如景書令官歸難掌辯五恩微恩各六冊惟車民微據

神典辭出為幾翻秋同賦亦開二十籍平對神辭案以

翁一字吳山益觀人舉人舉五十三平去如內閣中書

中書典外軍時入卷玉五世與賦博學對師五世宅林

右中書典故彙紀八卷吾杭王拙餘世叔所抄撮也
乾隆戊子余讀書于見山樓與世叔朝夕相處世叔出
此書命余校補紀憶所及已補三百餘條後又借書于
鮑氏知不足齋杭氏道古堂較正訛字之下又補四十
餘條稿已六七易矣丁酉秋拙餘捐館不忍讀是書者
歷有年所今夏曝書取寫淨本復爲較對又補若干條
雖不能無遺而大段已備惜無藏書之家得廣所未見
尙俟後之博雅君子時乾隆五十七年太歲在壬子六
月生霸日素門趙輯寧謹識